

Yesu Keliso yana HAWAVEMOGATALA Yoni gi'eno'itayena amanadi

Hida buki Yoni Loma kabemani yadi aba'aiyogona himula ana egana Fatimo againe gimiyami tu gi'etoladina. Yesu lobameya gilaka-yo malamala 35 amine hihegedi tu Yoni gi'etoladi. Buki ana etoladi tovai-nadi Yesu ana tovetumagana ve'umagigi lakahina Loma kabemani nimadiya hinuhagana, ada Yoni nuwanuwana ase'asedi ginakivevatuna, kadu ginalu'ageyedi higa yadi atuvefa'ila againe hinafaiwala-mo'a.

Nagona Yoni Yesu Tauna gi'eno'itayena tu Yesu yana venuwa'ata ekelesiya seveni agaidiya ginogalina-ma gi'etoladina. Muliya eno'ita tulina tulina agaidiya gavadi gavadi aimo hinalakayemu-ma Yesu Yoni againe gihawavemogatalena, ada Yoni bukiya ide agaideya gihawavelevelena. Gavadi aimo ginalakayemu-ma Yesu gaitoma tulina tulina agaidiya gilufefosedi. Gaitomai-dina tufona gahetalahobuhobu amine ada adi nuwanuwa aimo ka'itahowahowana.

Atu buki ana nuwanuwa lakahina au mahamahali-mo'ena, higa Yaubada Kaiwabu Yesu Keliso againe Setani ahenao kadu tomiyababi gaveyao agaidiya hihawahegedi-ma matatabudi ginafaiwalahegehege-mo'edi yo ginaluyaweyaweli-vagahidi. Adi agolaufofola hinanuhagani-yo Yaubada yana yo'ogaga lobama babi ivagudi agaidiya yadi wavemwamwala-vagata Yaubada buye hinamiyamiya-vagata. Buki dobona hidede amine.

Buki inubana kadu ekelesiya seveni adi lusiule. 1:1-8

Yoni Keliso gi'eno'itayena. 1:9-20

Keliso yana leta ekelesiya seveni agaidiya ma. 2:1-3:22

Buki uwa'uwana ana itava bulava seveni ma. 4:1-8:1

Tovenuwa'ata seveni yadi hiulega ana aiyuve ma. 8:2-11:19

Wayo'o kadu kevakeva manimaninidiyao adi'iselu ma. 12:1-13:18

Eno'ita tulina tulina ma. 14:1-15:8

Yaubada yana ila'a wanau'ana seveni ma. 16:1-21

Babiloni ana lauyawela kadu kevakeva manimaninina, falofita ve'alololona,
bana Setani tauna adi agolaufofola ma. 17:1-20:10

To'alika adi vedewayauga-vagata ma. 20:11-15

Lobama babi Yelusalema ivagudi fa'ina. 21:1-22:5

Yesu yana yewa'ela fa'ina. 22:6-21

Buki inubana fa'ina.

1 ¹Hida buki ana gahegahe ma Yaubada Yesu Keliso givelena be higa gavadi gavadi tova kabisona makewa'e hinalakayemu, medema Yesu Keliso ide Yaubada ana agetoga agaideya ginahawavemogatalena. Yesu Keliso yana tovenuwa'ata lobama amine gi'iveninisena be mena gaitomai-dina hinalakayemu-ma iya Yoni gihawaveleveleku, iya Bana ana agetoga amanadi. ²Iya Yoni gaitoma matatabuna ga'eno'itayena-ma agaimiya omi ga'awatalatalainena. E, Yaubada yana inuba gihawavemogatalena be Yesu Keliso gi'awatalatalainena-ma fa'ina hida buki againe gavenuwa'atami. ³Gaitomai-dina hinalakayemu-ma adi aituha gilurveda'ufo. Mena aituha gilurveda'ufo fa'ina, hai kaliva hida Yaubada yana venuwa'ata ana gahegahe yo'o matadiya ginahawana, medema vemwamwala ginanuhagana. Kadu kaliva gaveyao hida buki ana hawa hinanogalina be ana nuwanuwa hinavenogalena, medema vemwamwala hinanuhagana.

Yoni yana lusiule tovetumagana adi yo'o seveni agaidiya.

⁴⁻⁶“Siule tobohiyakweyao omi tovetumagana ami yo'o seveni Esiya ana fafaliya wamimiyami-ma kalivai-mina. Iya Yoni hida yami leta ga'etoladina be wana'itana. Yaubada kadu Bana Alu'aluwana kadu Yesu Keliso hinanuwadogemi kadu ase'ase mi hinakiveniwalovina. Bana Yaubada ma tova moya'aina gimiyamiya-vagata, e tuwaina gimiyami adamoya gimimiyami aimo ginamiyami. Bana Yaubada Alu'aluwana ana ita'ita vaita alu'aluwana seveni amine, ada Yaubada yana didiga'u'u wamagigine himimiyami. Bana Yesu Keliso ma to'awatalatalaina dibudibumuhigina ada Bana Yaubada Natuna anakaibe'u-mo'a alikeya gimadusivemididina, ada kadu Bana'e babi ana tovehimeya moya'aidi adi Tokaiwabu.

Tu ide Bana Yesu Keliso kanahawadavadavana, fa'ina Bana agaideya ginuwanuwa ada dayagina gimadu-yo yada koyona ana laufata gisena be giyauada, kadu gikilakahida be yana abavehimeya againe ide Bana buye kavehivehimeya, kadu yana Yaubada Tamana ana hawadavadava ana tofaisewa giseda. E, Yesu Keliso ana egana kanakilakahina ada yana kikaiwabu yana faiwala ginaduva-vagata tova inaga inaga keke ana abalauyabu. Ehe hidedemi. ^{7b}Wese wa'ita, buhibuhi againe gi'ela'ela ada kaliva moya'ai-mo'eda kana'itana. E, badi hi'onana-ma taumadi hina'itana ada tomiyababi moya'aidi fafali tulina tulina agaidiya Bana tovmatahiwadi gi'ela'ela fa'ina taudiyao fa'idiya hinatagilulaukuhi. Wona velemona ehe hidedemi.

^a 1:4-6 Ha 4:5, 17:14; Kl 1:17-18; 1Yn 1:7; 1Fi 2:9; Ha 20:6 ^b 1:7 Md 24:30; Yo 19:34,37; Af 1:11

⁸Yaubada Kaiwabu Bana'e tova moya'aina gimiyamiya-vagata, e tuwaina gimiyami adamoya gimimiyami aimo ginamiyami amanadi gigahe gigayo, “Iya inubane kadu tabone.” Hidedemi Yaubada Tofaiwalamo'a gigahe.

Yoni Keliso gi'eno'itayena.

⁹Tu iya'eku kadu omi'iyao Yesu yana kaliva fa'ina, iya Yoni omi tawami, ada omi amine meda iya'eku vita lakahina Yesu fa'ine kanunuhagana kadu yana abavehimeya againe kamimiyami kadu yana veluga againe ka'atu'atufefa'ila. Iya Yaubada bonana galumamalena kadu Yesu fa'ine ga'awatalatalaina fa'ina hikive'aviku-yo yadi aba'aiyogona himula ana egana Fatimo againe hinauweku. ¹⁰Fatimo gamiyami tu tafaloloya higa yada Kaiwabu yana aiyeta Bana Alu'aluwana giluvaiyeku-yo tamo hakwadi agona vaita hiulega agona amine wamulikuya ganogalina. ¹¹Bana gigahe'awafatafata gigayo, “Gavadi gavadi wana'itadi medema bukiya wana'etoladina be tovetumagana adi yo'o seveni agaidiya wana'iveninisena be hina'itana. Yo'oi-dina seveni yadi melala hidede amine, Efeso, Simena, Fegamo, Daiyataila, Sadisi, Filadelifiya, Leyodisiya.” Hidedemi gigahe.

¹²Tu iya gahagavilaku higa hakwadi gigahegaheku ma gada'itana. Gahagavilaku-yo lamufa ana abasewadi seveni gola againe hibubudima ga'itadi. ¹³Ada lamufa ana abasewadi hinafadiya kaliva sa'eyana ga'itana, ana ita vaita Bana'e givekaliva-ma amine. Vaigau kikaiwabuna gi'osena higa ana aikeva tunugina agena gilifi-'owona, ada niniwala gola againe hibubuna-ma avaune gihifona. ¹⁴U'una vaita galu'eguhi amine, au gikwayanuwanuwa howahowa amine kadu matana give'akinamanamalena vaita ai'ala'alata amine. ¹⁵Kadu agena ve'akinamanamalina ana ita vaita kainumula yagoyagona ai'ala'alata lakahina againe hikabuna be give'akinamanamalena amine. Kadu agona vaita gufa lakahina gihobuhobu butuna amine. ¹⁶Nimana i'atagine ibadibadi seveni gi'abidi ada fetu nigona luhei sinasinahina awane giyemu. Magigina give'akinamanamalena vaita kauwana getadeya ana ita amine.

¹⁷Tu iya ga'itana againe Bana agene babiya gabe'u vaita ali'alikaku amine. Au nimana i'atagina agaikuya gisena gigaheku gigayo, “Keke unamatauta. Iya Abave'inuba kadu Abalauyabu. ¹⁸Iya Tomiya-vagata. Boi ga'alika tu u'ita, wayawaiku gamimiyami ada ganamiyamiya-vagata tova inaga inaga keke ana abalauyabu. Iya alika kadu to'alika yadi abaga ana tovehimeya, ana kihi Iya nimakuya.

¹⁹Au hidema fa'ina gavadi gavadi u'ita'itadi, medema una'etoladina. E, gavadi tova adamoya ahe gilakayemu kadu gavadi aimo tova mulina

ginalakayemu, medema bukiya una'etoladina. ²⁰Ibadibadi seveni i'atagikuya ga'abidi be u'itadi-ma kadu lamufa ana abasewadi gola againe hibubuna-ma adi nuwanuwa sevasevauyana hidede amine. Ibadibadi seveni au Yaubada yana tovenuwa'ata badi tovetumagana adi yo'o seveni hi'ita'itave'avididi. Ada lamufa ana abasewadi seveni au tovetumagana adi yo'o seveni." Hidedemi gigahē.

Keliso yana venuwa'ata Efeso tovetumagana adi yo'o agaidiya.

2 ¹Kadu Keliso gigaheku gigayo, "Fefe una'etoladina be Efeso againe ginana, higa bana Yaubada yana tovenuwa'ata tovetumagana adi yo'o gi'ita'itave'avididi-ma yana leta. Hidedemi yaku nuwanuwa una'etoladina badi miEfeso unagahedi unagayo,

Ibadibadi seveni i'atagikuya ga'abidi be lamufa ana abasewadi gola hinafadiya ganunudadana-ma Iya bonaku hidede amine.

²Yami dewa gahalamanena. Yami vediwe kadu yami atuvefa'ila gahalamanena. Kadu omi gahalamanemi, keke nuwanuwami badi tove'alololo kaliva koyodiyao buye wanamiyami, ada badi higahe vaita taudiyao afositolo tu keke velemodi ma ahe wagaluvaluvadi-yo wahalamanena badi hive'alololo. ³Omi yaku kaliva fa'ina vita tulina tulina wanuhagana tu tova moya'aina wa'atu'atuvefa'iledi be yami vetumagana againe keke wadagakowakowa, au wa'ase'asevatu.

⁴Mena yami dewa haghigina tu huluva sa'eyana fa'ina ganadakeyemi. Boi nagona ve'ahawahawahega againe wamiyami, tu adamoya keke. ⁵Ve'ahawahawahega againe wa'ilova fa'ina, yami be'u lakahi-mo'ena. Au nuwami ginanunauyena be gavaiya'amine wabe'u ma wanahalamanena. Wananuwavilami be boi nagona Iya fa'ikuya wanuwauwami amine adamoya wanahuluhuluva. Ka'i mena yami koyona keke wanavenikohiyeni digo, agaimiya gana'ela yami lamufa ana abasewadi ganalemami be wanamiya-kawowo. ⁶Tu yami dewa sa'eyana nuwaku gikiveyamumuna. Badi Nikolesi yana yo'o adi tufo yadi dewa koyo-mo'ena wavenikohiyena, meda Iya gavenikohiyena amine.

⁷Omi watagami gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Hai kaliva Iya fa'ikuya yana atuvefa'ila againe ginafaiwala-mo'a, medema ganahawahegena be yawai-vagata ana ai againe gina'a. Ai-nadi Yaubada yana faha Faladasi againe gimidimidi. Au hidedemi bonaku."

Keliso yana venuwa'ata Simena tovetumagana adi yo'o agaidiya.

⁸Kadu'e Keliso gigaheku gigayo, "Fefe una'etoladina be Simena againe ginana, higa bana Yaubada yana tovenuwa'ata tovetumagana adi yo'o

f 2:2 1Yn 4:1; 2Yn 1:7-11 § 2:5 Ha 3:3 h 2:7 Ha 22:1-2,14

gi'ita'itave'avidima yana leta. Hidedemi yaku nuwanuwa una'etoladina miSimena unagahedi unagayo,

Iya Abave'inuba kadu Abalauyabu. Boi ga'alika tu gamididi-havagi ma bonaku hidede amine. ⁹Omi vita tulina tulina wanuhagana ma gahalamanena. Kadu gahalamanena omi koyokoyomiyao yami lokoloko hilemami tu Yaubada matane omi wakalivamiyao. Iya gahalamanena miYuda tufoidi hiveyaveyainemi. Badi kalivai-dina higahe vaita badi Yaubada yana yo'ogaga. Manuwa-abavehawala ana egana sinagogi againe hitafatafalolo nonogana yadi dewa againe kahalamanedi higa badi Setani yana yo'o. ¹⁰Tova kabisona ve'umagigi lakahina Iya fa'ikuya wanuhagana tu keke wanamatauta. Gagahemi Setani yana vehimeya againe tufoimi deliya hinase mi be yami vetumagana hinagaluvuvana, ada aiyeta teni agaidiya vita lakahina wanuhagana be ginahavaina. Ka'i nibaikweyao hinakivekoyomi higa hidaluve'alikami, au ai'adi yami wavetumagana agaikuya wanaluve'avina-vagata ada yami atuvefa'ila fatana higa yawai-vagahimi ganavelemi.

¹¹Komi watagami gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Hai kaliva Iya fa'ikuya yana atuvefa'ila againe ginafaiwala-mo'a, medema alika anavelu kaliva koyodiyao hinanuhagana-ma keke-mo'a ginakivekoyoni. Au hidedemi bonaku.”

Keliso yana venuwa'ata Fegamo tovetumagana adi yo'o agaidiya.

¹²Kadu'e Keliso gigaheku gigayo, “Fefe una'etoladina be Fegamo againe ginana, higa bana Yaubada yana tovenuwa'ata tovetumagana adi yo'o gi'ita'itave'avidima yana leta. Hidedemi yaku nuwanuwa una'etoladina miFegamo unagahedi unagayo,

Feto nigona luhei sinasinahina Iya awakuya giyemu-ma bonaku hidede amine. ¹³Yami abamiyami gahalamanena. Mededei Setani givivehimeya kaliva moya'aidi bana againe hihawahegedi fa'ina. Atu omi'iyao ma Iya agaikuya aimo waluluve'avina, yami vetumagana keke wadahegeni. Mene yami melala Setani yana abavehimeya ma againe yaku tohawavemogatala ana egana Anidifasi Iya fa'ikuya gi'atuefa'ila tu hiluvel'alikana. Ana luvel'alika wa'itana nonogana keke wadanuyabuyabuku.

¹⁴Wona velemona Iya fa'ikuya wa'atuefa'ila tu yami dewa tufona fa'ina ganadakeyemi. Tuwai-mo'ena tovehimeya sa'eyana ana egana Belaki nuwanuwana miIsileli gina'ivehamumudi. Ada falofita

ⁱ 2:9 2Ko 11:13-15 ^j 2:10 2Ti 4:8; Ye 1:12; 1Fi 3:14; Lu 22:31-32 ^k 2:11 Ha 20:14, 21:8
^l 2:12 Hi 4:12 ^m 2:14 Ail 25:1-9, 31:16

sa'eyana ana egana Belamu bana Belaki miIsileli yadi bwavi ana eda givehawalena gigayo, Ka'i miIsileli Yaubada matane hinakoyo, au Yaubada gaviya againe keke ginavelugadi. Wananuwa'abiyedi be kevakeva mali kaliva kilumina agaidiya hihawadavadavayena-ma hina'ana, kadu udo tulina tulina agaidiya hinahawahegedi. Hidedemi Belamu givehawala-yo Belaki miIsileli mena koyonai-dina agaidiya givebe'udi be hibwavi. ¹⁵Meda anafaiweya kaliva tufoimi yami yo'o agaimiya badi Nikolesi yana yo'o adi tufo yadi vehawala koyo-mo'ena himuliyena. ¹⁶"Mena dewai-dina gavenikohiyena fa'ina wananuwavilami. Ka'i keke wananuwavilami digo, tova kabi'ona agaimiya gana'ela badi kaliva koyodiyao fetu awakuya giyemu-ma againe ganalugaviyadi.

¹⁷"Omi watagami gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Hai kaliva Iya fa'ikuya yana atuvefa'ila againe ginafaiwala-mo'a medema a'a sevasevauyana ana egana mana againe ganave'ana. Kadu kabala kwayakwayana ganavelena, kabalai-nadi againe egana kilukilumina ivaguna gidadauda, tu keke tamo hakwadi mena eganai-nadi gidahalamaneni au bana ganavelena-ma anakai-be ginahalamanena. Au hidedemi bonaku."

Keliso yana venuwa'ata Daiyataila tovetumagana adi yo'o agaidiya.

¹⁸^PKadu'e Keliso gigaheku gigayo, "Fefe una'etoladina be Daiyataila againe ginana, higa bana Yaubada yana tovenuwa'ata tovetumagana adi yo'o gi'lita'itave'avidima yana leta. Hidedemi yaku nuwanuwa una'etoladina miDaiyataila unagahedi unagayo,

Iya Yaubada Natuna matakua vaita ai'ala'alata amine kadu ageku give'akinamanamalena vaita kainumula yagoyagona kaliva hiyahayahana-ma amine ma bonaku hidede amine. ¹⁹Yami dewa gahalamanena, yami ve'ahawahawahega kadu yami vetumagana, yami idibumuhiga kadu yami atuvefa'ila. Boi nagona yami hawahega agaikuya tufona tu adamoya lakahi-mo'ena.

²⁰Mena yami dewa galukahihiyena-ma haghigina tu huluva sa'eyana fa'ina ganadakeyemi. Mene yami yo'o agaimiya kwamayoku sa'eyadi himimiyami, yadi dewa ma tuwaina Isileli tokaiwabu vavinena adi egana Yesebeli yadi dewa koyo-mo'ena amine. Wama kwamayoku koyodi taudi hivewagadi vaita badi Yaubada bonana ana to'awatalatalaina, ada yadi vehawala againe yaku tofaisewa tufoidi dewa koyona againe hinuwa'abiyedi. Hivehawaledi vaita udo tulina tulina kadu kevakeva kilumina agaidiya mali kaliva

hihawadavadavayedi-ma ana'a au gilubodadi. Hidedemi yaku tofaisewa hinuwa'abiyedi tu omi keke kwamayoku wadawahatadi au wahawahegedi. ²¹Iya tova gaveledi higa yadi udo hidavenikohiyena be Iya agaikuya hidahagaviladi, tu hidibutoyoga. ²²Keke nuwanuwadi yadi dewa udo'udona hinahegeni fa'ina, aulolo ana iviya ganahagedi ada badi buye hi'udo'udo-ma vita keke kabi'ona ganaveledi. E, ka'i badi'e adi tufo keke yadi dewa udo'udona hinavenikohiyeni digo, adamoya aulolo tagiya lakahina ganaveledi. ²³Badi yadi vehawala nuwadi givaina amanadi vaita natudiyao amine, ada kadu badi'iyao ganaluve'alikadi. Ada au tovetumagana adi yo'o melala tulina tulina agaidiya hinahalamanena Iya kaliva ase'asedi kadu nuwadi ga'ita'itafolela, ada omi sa'eyana sa'eyana yami dewa amine ganalaufata.

²⁴⁻²⁵Tu omi velugamiyao Daiyataila againe wamimiyami-ma kadu agaimiya ganagahe, higa omi mena vehawala koyona wadibutoyogena ada keke nuwanuwa i'ikauna hivewagana Setani yana nuwahinage ma againe wadasikulu. Yaku gahe hidede amine. Keke vehimeya vitana kadu ganavelemi. Au mena yami dewa haghigina ahe galukahihiyena-ma wanakidonena wananunauwena tu yaku yewa'ela ana tova.

²⁶⁻²⁸[¶]Hai kaliva Iya fa'ikuya yana atuvefa'ila againe ginafaiwalamo'a be yaku nuwanuwa amine ginahuluhuluva alika ana maka, medema abavehimeya ganavelena be tomiyababi adi yo'o tulina tulina ginavehimeyedi. Boi Kamaku abavehimeya giveleku amine, meda badi Iya fa'ikuya hi'atuvefa'ila-ma ganaveledi. Yadi wafuluma kainumula yo'o tulina tulina hina'itave'avididi be fuluma avaeka giluyavalina amine nibaidiyao fifiwaladiyao hinaluyawelidi. Kadu badi to'atuvefa'ila malatutulova ganaveledi.

²⁹Omi watagami, gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Au hidedemi bonaku.”

Keliso yana venuwa'ata Sadisi tovetumagana adi yo'o agaidiya.

3 ¹Kadu'e Keliso gigaheku gigayo, “Fefe una'etoladina be Sadisi againe ginana, higa bana Yaubada yana tovenuwa'ata tovetumagana adi yo'o gi'ita'itave'avididi-ma yana leta. Hidedemi yaku nuwanuwa una'etoladina miSadisi unagahedi unagayo,

Iya Yaubada Alu'aluwana ana ita vaita alu'aluwa seveni amine kadu ibadibadi seveni agaikuya hidadauda-ma bonaku hidedemi.

Yami dewa gahalamanena. Omi valeyami ma vaita yami vetumagana

¶ 2:26-28 Sam 2:8-9; Ha 22:16

toyogina amine kaliva matadiya, atu wona velemona omi to'alika yami vetumagana kabisona ginahavaina. ²Wamidi! Mene yami vetumagana kabisona ginayawowola-ma wanakivetoyogina. Wa'ita, Iya gahalamanena yami dewa aimo keke haghigagi-mo'ena yaku Yaubada matane. ³Aimo keke velemona wadanuwawuwa-haghigagi fa'ina, gavaimi yaku kaliva givhawalemi be wanogalina, medemi wanuwawuwa-nunauyena. Au vehawala wavenogale be wanuwawilami. Atu ka'i keke wanamidi, au tokai'afu amine gana'elakau be matahiwadi againe ganaveyaulowogimi.

⁴Atu Sadisi againe tufoimi ami kaleko keke wadakivebwaneneni, higa yami dewa yegayegana. Medema fa'ina kaleko kwayakwayana againe wanavaigau-yo Iya buye kananunudana, fa'ina au amifata. ⁵Hai kaliva Iya fa'ikuya yana atuvefa'ila againe gifaiwala-mo'a, medema badi'iyao amine kaleko kwayakwayane ginavaigau. Kadu bana ana egana yaku buki againe keke-mo'a ganayawelini. Bukinadi againe badi wayawai-vagahidi ma adi egana gidadauda. E, keke ganayawelini, au Kamaku matane kadu badi yana tovenuwa'ata matadiya bana fa'ine ganagahe ganagayo, Bana hidevama yaku kaliva.

⁶Omi watagami, gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Bonaku au hidedemi.”

Keliso yana venuwa'ata Filadelifiya tovetumagana adi yo'o agaidiya.

⁷Kadu'e Keliso gigaheku gigayo, “Fefe una'etoladina be Filadelifiya againe ginana, higa bana Yaubada yana tovenuwa'ata tovetumagana adi yo'o gi'ita'itave'avidima yana leta. Hidedemi yaku nuwanuwawa una'etoladina miFiladelifiya unagahedi unagayo,

Iya kaliva mahamahaliku kadu velemodi ma bonaku hidedemi. Tuwai-mo'ena tokaiwabu Devida Yelusalema ana tovehimeya, ada kihi bana againe kaliva yadi luku fa'ina. Meda Iya Yelusalema ivaguna ana tovehimeya ada kihi we'a agaikuya. Ka'i mena yaku abaga ana wanafali ganayauna, au keke tamo hakwadi anafaiweya ginafalini. Kadu ka'i ganafalina, keke tamo hakwadi ginayauni.

⁸Yami dewa gahalamanena. Yami faiwala kabi'ona nonogana bonaku wa'abina kadu keke wadavekekeyeku. Au wanafali omi matamiya gayauna tu keke tamo hakwadi anafaiweya ginafalini. ⁹Kadu ganagahe. MiYuda tufoidi yami melaleya higahe vaita badi Yaubada yana yo'ogaga tu hifwaya. Manuwa-abavehawala ana egana

^r 3:3 1Te 5:2 ^s 3:4 Yu 1:22-23; Lu 10:20 ^t 3:5 Md 10:32 ^u 3:7 Ais 22:22

^v 3:9 Ais 60:14

sinagogi againe hitafatafalolo nonogana badi Setani yana manuwaka kalivai-dina. Yaku vehimeya againe badi kalivai-dina agaimiya hina'ela hina'ibo'ula-mo'a, ada hinahalamanena Iya Tauku agaimiya ganuwanuwa. ¹⁰Boi gavehimeyemi higa vaita yami wa'asevatu Iya fa'ikuya wada'atufefa'ila. Mena bonaku wa'abina fa'ina, aimo vita lakahi-mo'ena fafali tulina tulina agaidiya ginalakayemu be tomiyababi moya'aidi ginagalualuvadi ana toveya, Iya omi ganalugolegolemi.

¹¹Wa'ita, Iya ganamadu'ela. Yami faiwala kabi'ona nonogana yami vetumagana wanakidonena be higa keke tamo hakwadi ami laufata haghigagina ginalemami. ¹²Hai kaliva Iya fa'ikuya yana atufefa'ila againe ginafaiwala-mo'a, ganavehimeya be bana yaku Yaubada yana manuwaka ginave'ogolena. Keke-mo'a ginahobu, Yaubada matane ginamiyamiya-vagata. Bana againe egana tohiye gana'etoladidi, eganai-dina yaku Yaubada ana egana, yaku Yaubada yana melala ana egana higa Yelusalema ivaguna aimo yaku Yaubada againe walobameya ginahobu'ela-ma melalai-nadi, kadu aku egana ivaguna.

¹³Omi watagami, gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Au hidedemi bonaku.”

Keliso yana venuwa'ata Leyodisiya tovetumagana adi yo'o agaidiya.

¹⁴Kadu'e Keliso gigaheku gigayo, “Fefe una'etoladina be Leyodisiya againe ginana, higa bana Yaubada yana tovenuwa'ata tovetumagana adi yo'o gi'ita'itave'avidima yana leta. Hidedemi yaku nuwanuwa una'etoladina miLeyodisiya unagahedi unagayo,

Iya aku egana To'asevatu, Iya Yaubada ana tohawavemogatala dibudibumuhigiku yaku gahe velemo'ena, Yaubada yana aibubuna Iya agaikuya give'inuba-ma kalivai-kuna bonaku hidede amine.

¹⁵Yami dewa gahalamanena. Keke wadakiloweku tu kadu wakiloweku. Iya nuwanuwaku wana'idibumuhigeku. Ka'i keke wana'idibumuhigeku au wanakiloweku. ¹⁶Keke wadakiloweku tu kadu wakiloweku fa'ina, omi vaita gufaleda wayawayana kaliva hikilowena amanadi. Omi keke bwai ginaginana amine kadu keke gufa tutumina amine. Omi vaita wayawayamiyao fa'ina gana'alahiwegemi. ¹⁷Omi wagahe wagayo, Ide wakalivadeyao. Lokoloko moya'aina kanuhagana, gaitoma moya'aina adafaiweya. Hidedemi wagahe tu keke wadahalamaneni omi koyokoyo'avamiyao

^w 3:11 Ye 1:12 ^x 3:12 Ha 14:1 ^y 3:14 Kl 1:15; Ha 19:11 ^z 3:15 Lo 12:11

^a 3:17 Lu 12:21; Ye 2:5

yami miya koyona, Yaubada yana lokoloko ana yaudi wafaniyena, omi vaita tovematakoyo kadu tovekonekone amine. ¹⁸ ^bAu gagahevagadonemi be lokolokofou gola-mo' enaga amine Iya agaikuya wanakimonena be amifaiweya wanakaiwabu. Mena gola ma babiya hiyalana digo wayogona buye hivetagovina be gi'ulafuwana againe gola-mo' ena avaekeya gida tu momolu hihegena. Kadu kaleko yegayegana agaikuya wanakimonena be yami vekonekone wanakevani-yo yami wowomumu ginahavaina. Kadu vematakoyo ana mulamula agaikuya wanakimonena be matamiya wanaseni-yo nuwanuwa velemo' ena amifaiweya wana'itahalamanena.

¹⁹ ^cGaveyao agaidiya ganuwanuwa, medema gadakeyedi kadu gakivenuwaviladi. Omi agaimiya ganuwanuwa fa'ina, wanamadunuwavilami ada wana' i'idibumuhiga. ²⁰ ^dIya we'a lilimiya gamidimidi. Kaliva tobohiyana yana eda'awaneya gilautoli higa vaita gidaluku amine, meda Iya nuwami ana eda'awaneya galulautoli higa nuwamiya gadaluku. Gava kaliva agoku ginogalina be gihawahegeku, medema againe ganaluku be bana ganavetobohiyana kadu Iya ginavetobohiyaneke. ²¹ ^eBoi yaku atuvefa'ila againe gafaiwala-mo'a be Kamaku yana didiga'u'u againe buye avetogama. Meda anafaiweya hai kaliva Iya fa'ikuya yana atuvefa'ila againe ginafaiwala-mo'a, medema ganahawahegena be yaku didiga'u'u againe buye anavetogama.

²² Omi watagami, gavaimi Yaubada Alu'aluwana omi tovetumagana ami yo'oi-mina agaimiya gigahegahe, medema wanavenogalena. Au hidedemi bonaku.”

**Tomiyalobama moya'aidi Yaubada yana
didiga'u'u againe hihawadavadavana.**

4 ¹ Tu Keliso yana venuwa'ata tovetumagana adi yo'o seveni agaidiya gilukahihi gihavaina, kadu ga'eno'ita. Gamiyami tu auhe'ama wanafali yauyugina lobameya ga'itana. Bana agonai-nadi vaita hiulega amine boi gamidinogalina-ma gigahe-havagileku gigayo, “Ulaka'ela we'ai, be aimo kabisona gavadi gavadi makewa'e hinalakayemu-ma ganavehawale.” ² ^fGigahe-yo auhe'ama Yaubada Alu'aluwana giluvaiyeku ada mene lobameya didiga'u'u matakuya gidadauda ada Kaliva Sa'eyana didiga'u'uya givetogana. ³ ^gAda Bana didiga'u'uya givetogana-ma ana ita'ita mahamahali-mo'ena vaita kabala yabeyabelidi luhei yamuyamumu-'owogina kadu ve'akinamanamalina amine. Kabalai-

^b 3:18 Ais 55:1 ^c 3:19 Hi 12:7 ^d 3:20 Yo 14:23 ^e 3:21 Md 19:28 ^f 4:2 Ais 6:1
^g 4:3 Isi 1:28

dina adi egana diyasifa kadu kaneliyani. Kadu mena didiga'u'uya bowa gidonena ana ita vaita kabala matamatagina ana egana emelodi amine. ⁴Mena didiga'u'u kikaiwabuna hinafane gidadauda ada didiga'u'u kadu tuweniti-fowa himidififina, tu didiga'u'u-dina agaidiya tomialobama adi tonagona tuweniti-fowa hivetogadi. Kaleko kwayakwayana againe hivaigau ada u'udiya badau kikaiwabuna gola againe hibubuna-ma gidadauda. ⁵Ada mena Yaubada yana didiga'u'u kikaiwabuna againe tova moya'aina nama gisisinamana, vaita gaveyao agodi amine butuna lakahina gilaulauga, atala gihegehegena. Kadu didiga'u'u wamagigine daki seveni hi'ala'alata, higa Yaubada Alu'aluwana ana ita alu'aluwa seveni. ⁶Kadu didiga'u'u gava wamagigine tamo gavadi ga'itana ana ita ma vaita lehaga atumanamanahina amine, e kabala vaita kelasi amine ve'akinamanamalina.

Tu hinafane-mo'ane gaitoma wayawaidi fifiwaladiyao adivefowa Yaubada yana didiga'u'u himidififina, ada matadi wowodi matatabuna gilagana wamagigidiya kadu wakwaudiya. ⁷Ada badi gaitoma wayawaidi fifiwaladiyao adivefowa sa'eyana ma ana ita vaita kevakeva manimaninina ana egana laiyoni amine, kadu sa'eyana ana ita vaita bulumakau hala amine, kadu sa'eyana magigina ana ita vaita kaliva amine, kadu sa'eyana ana ita vaita manubutu giyaveyavega-ma amine. ⁸Ada badi gaitoma wayawaidi fifiwaladiyao sa'eyana sa'eyana wa'ofadi sikisi ada wowodi matatabuna agaidiya tabone kadu dibune matadi gilagana. Tova moya'aina hikwelidavadava uyadayada be bogi hinunauwena tu keke ma'li hida'ilova higayo,

Mahamahalina, mahamahalina
Yaubada Kaiwabu Tofaiwala-mo'a
Bana'e au mahamahalina.

Tova moya'aina gimiyamiya-vagata,
tuwaina gimiyami adamoya gimimiyami
aimo ginamiyami keke ana abalauyabu.

Au hidedemi yadi kwelidavadava.

⁹⁻¹⁰Badi wayawaidiyao adivefowa Bana'e didiga'u'uya givetogana be gimiyamiya-vagata ma yadi kwelidavadava againe hihawavekaiwabuna kadu hive'amohimohinena kadu hivesivesiuleyena ana toveya, au badi tomialobama adi tonagona tuweniti-fowa Bana didiga'u'u againe givetogana-ma againe hi'ibo'ula-mo'a, ada hidedemi Bana gimiyamiya-vagata-ma hihawadavadavana. Adi badau kikaiwabuna Bana agene hihegena higayo,

¹¹O'eni yama Kaiwabu kadu yama Yaubada.
Gilubodama be anahawavekaiwabuye,

kadu O anave'amohimohine be
 a egana fifiwala-mo'ena anakilakahina.
 E, yama hawadavadava O giluboda.
 Fa'ina gaitoma moya'aidi O ububudi,
 ya nuwanuwa againe hilakayemu
 be adamoya himimiyami.

Au hidedemi yadi kwelidavadava.

Yesu Yaubada yana Sifi kabi'ona buki uwa'uwana gisiyagilina.

5 ¹Gamiyami tu Bana'e didiga'u'uya givetogana-ma buki uwa'uwana nimana i'atagine ga'itana. Buki-nadi againe etoladi wafafalina gidadauda, ana itava bulava seveni vaita autafa amine. ²Ada lobama ana tovenuwa'ata fifiwalana ga'itana, bana gikova'awafatafata gigayo, "Hakwa'adi yana wa'abavehimeya gimimiyami-yo anafaiweya bulava ginagolohini-yo buki ginasiyagilini?" ³Tu keke tamo hakwadi lobameya o babiya o to'alika yadi abageya gidamiyami-yo anafaiweya buki gidasiyagilini-yo hinagene gida'ita. ⁴Ada keke tamo hakwadi yana wa'abavehimeya hidanuhagani-yo anafaiweya buki gidasiyagilini be hinagene gida'ita amanadi fa'ina, iya gatagitagi lakahina. ⁵Gatagitagi tu tomialobama adi tonagona adi yo'o kalivana sa'eyana Yesu fa'ine gigaheku gigayo, "Keke unatagitagiya. U'ita, bana tokaiwabu Devida bwanenena kikaiwabuna Yuda yana yo'o kalivana gifaiwalahegahega-mo'a. Bana'e kaliva fifiwala-mo'ena ana egana Yuda yana yo'o ana Laiyoni. Bana gifaiwalahegahega-mo'a fa'ina anafaiweya bulava seveni ginagolohidi be buki ginasiyagilina."

⁶^kGigahe-yo Sifi kabi'ona ga'itana, didiga'u'u hinfane-mo'ane gimidi ada badi wayawaidi fifiwaladiyao adivefowa kadu tomialobama adi tonagona tuweniti-fowa himidififina. Bana Sifi kabi'ona ana ita waki'onina vaita gida'alika be gidamididi-havagi, ada ana siko seveni kadu matana seveni, medema Yaubada Alu'aluwana ana ita vaita alu'aluwa seveni amine, badi Yaubada fafali tulina tulina babiya gi'iveninisedi amanadi. ⁷Bana gina buki Yaubada i'atagine gidadauda-ma givaina. ⁸^lGivaini-yo badi wayawaidi fifiwaladiyao adivefowa kadu tomialobama adi tonagona tuweniti-fowa Sifi kabi'ona againe hi'ibo'ula-mo'a. Badi sa'eyana sa'eyana agaidiya kweli ana aba'iveyamumu vaita kita haghagina amine hidadauda, kadu nau'a gola againe hibubuna-ma hi'abina. Vanedimodimo ana egana inisenisi nau'a gola himaga, inisenisi ana nuwanuwa ma Yaubada yana yo'ogaga yadi ve'o'ola Yaubada againe. ⁹^mAda kweli ivaguna Yesu againe hikwelikweliyena higayo,

Ya wa'abavehimeya fa'ina giluboda

^k 5:6 Sak 4:10 ^l 5:8 Ha 8:3-4, 15:2; Sam 141:2 ^m 5:9 Sam 98:1

buki unavaina be ana bulava unagolohina.
 O giluboda fa'ina hiluve'alika
 ada O dayaginiya kaliva moya'aidi
 ututuvehobudi be Yaubada yana giba fa'ina.
 Badi kalivai-dina yo'o tulina tulina
 meyadi tulina tulina
 kadu adi loi tulina tulina
 ada fafali tulina tulina agaidiya hive'inuba.
 10 ^aAhe ukilakahidi be ya abavehimeya againe
 badi O buye wavehivehimeya,
 kadu yada Yaubada ana hawadavadava
 ana tofaisewa usedi,
 ada babi matatabuna hinavehivehimeyena.

Au hidede amine badi wayawaidi adivefowa kadu tonagona tuweniti-fowa
 yadi kwelidavadava.

**Tomiyalobama kadu gaitoma moya'aidi
 i'ibubunidi yadi kwelidavadava.**

11 ^oKadu'e ga'ita-havagi be lobama ana tovenuwa'ata keke sa'eyadi
 agodi ganogalina, adi kilagalaga tausani tausani a gavaiyehi. Badi
 tovenuwa'ata Yaubada yana didiga'u'u kadu badi wayawaidi fifiwaladiyao
 adivefowa kadu tomiyalobama adi tonagona tuweniti-fowa himidififidi.

12 Agodi lakahina hikwelikweli higayo,
 Yaubada yana Sifi kabi'ona hiluve'alikana.
 Gilubodana be Bana ide ginavehivehimeyeda,
 Yana lokolokofou yana nuwahuya
 yana faiwala fa'ina kanakilakahina.
 Gilubodada be Bana kanave'amohimohinena
 be kanakivekaiwabuyena be kanadavadavana.
 E, yada hawadavadava Bana gilubodana.

Au hidedemi tovenuwa'ata yadi kwelidavadava.

13 Kadu'e gaitoma moya'aidi i'ibubunidi lobameya babiya to'alika yadi
 abageya lehageya, e fafali moya'aina agaidiya himimiyami-ma yadi kweli
 ganogalina. Higayo,

Bana'e didiga'u'uya givetogana kadu
 Sifi kabi'ona adi egana kanakilakahina
 kadu kanave'amohimohinedi.
 Yadi kikaiwabu kadu yadi faiwala
 kanakivetubugina tova inaga inaga
 keke ana abalauyabu.

ⁿ 5:10 Ais 61:6; Ha 20:6, 22:5; 1Fi 2:9 ^o 5:11 Dan 7:9-10

¹⁴Au hidede amine moya'aidi yadi kwelidavadava tu badi wayawaidi fifiwaladiyao adivefowa higahe higayo, “Ehe hidedemi,” kadu badi tomialobama adi tonagona hi'ibo'ula-mo'a be Kaiwabu luhei hihawadav adavadi.

Buki ana bulava vaita autafa amine ma ana aigolota.

6 ¹Tu iya aimo galulauboda tu Bana Yaubada yana Sifi kabi'ona buki ana bulava vaita autafa amine bulava tomo'ainagona gigolohina. Gigolohini-yo gaitoma wayawaidi fifiwaladiyao adivefowa ana kaliva sa'eyana agona lakahina vaita atala gidahegeni amine ma gigahe gigayo, “U'ela.” ²Ga'ita tu auhe'ama hosi kwayakwayana mene matakuya gimidi. Hosi kwaune kaliva sa'eyana gihiyoto yana sufi gi'abina ada badau kikaiwabuna u'une hihifona. Au bana gitauya higa gidalugaviya be gidafaiwalahega-mo'a.

³Bana gina tu Sifi kabi'ona buki ana bulava anavelu gigolohini-yo gaitoma wayawaidi fifiwaladiyao anavelu agona ganogalina gigahe gigayo, “U'ela.” ⁴Au hosi velugana gilakayemu ana ita yabeyabeli-mo'ena. Bana kaliva kwaune gihiyoto ana vehimeya ma kukuya babi againe ginavaihegeni-yo kaliva buye hinave'amunumunuga. Ada fetu lakahina hivelena.

⁵Yana fetu hivelena gihavaina, Sifi kabi'ona buki ana bulava anaveto gigolohini-yo gaitoma wayawaidi fifiwaladiyao anaveto agona ganogalina gigahe gigayo, “U'ela.” Ga'ita tu auhe'ama hosi kukwauhi-mo'ena, mene matakuya gimidi. Bana kaliva hosi kwaune gihiyoto-ma lokoloko ana abasivekuke gi'abina. ⁶Au ago'ago ganogalina vaita tamo hakwadi gaitoma wayawaidi fifiwaladiyao adivefowa agaidiya gidakova gidagayo, “Kaliva moya'aidi hinafaisewa be fatadi aiyeta sa'eyana analaga hinavaina tu mani-nadi againe a'a kabi'onaga vaita kuvi sa'eyana o ka'i tafiyoko tohiye adifaiweya hinakimonena. Atu ai hagihagidi keke unakivekoyodi be higa bunama kadu oine aimo ginadauda.”

⁷Gilukahihi gihavaina Sifi kabi'ona buki ana bulava anavefowa gigolohini-yo gaitoma wayawaidi fifiwaladiyao anavefowa agona ganogalina gigahe gigayo, “U'ela.” ⁸⁹Ga'ita tu auhe'ama hosi ana ita vaita gidahaniwedalini-ma amine mene matakuya gimidi. Bana kaliva hosi kwaune gihiyoto-ma ana egana Alike ada bana wakwaune hosi velugana gimuliyena ana kaliva ana egana To'alika yadi Abaga. Badi adi'iseluga yadi wa'abavehimeya, adi vehimeya hidede amine. Tomiyababi tufoidi moya'aidi hinaluve'alikadi. Tufoidi ma buye hinave'amunumunuga be hina'alika, tufoidi lokeya hina'alika, tufoidi auloloya hina'alika, tufoidi kevakeva manimaninidiyao hinayovadi be hina'alika. Tomiyababi

hina'alika-ma adi kilagalaga hidede amine. Ka'i kanadakadi bo'u fowa againe digo, bo'u sa'eyana kalivai-dina hina'alika.

Tovetumagana kaliva hiluve'alikadi-ma yadi kova.

⁹Tu Sifi kabi'ona buki ana bulava anavefaifi gigolohina againe, Yaubada yana atudidiga inubane kaliva aluwadi ga'itadi, badi kalivai-dina Yaubada bonana againe hiluve'avina kadu Yesu fa'ine hi'awatalatalaina fa'ina kaliva koyodiyao hiluve'alikadi amanadi. ¹⁰Badi kaliva aluwadi moya'aidi hikova'awafatafata higayo, "Yama Kaiwabu Fifiwala-mo'e, O mahamahali, ya nuwanuwa matatabuna velemo'ena. Gava tova badi tomiyababi hiluve'alikama amanadi unavedewayaugidi-yo agaidiya dayagima unafatani?" ¹¹"Hidedemi higahe tu vaigau kwayakwayana badi sa'eyana sa'eyana giveledi ada gigahedi gigayo, "Tova kabisona yami wa'atuvefa'ila kadu wanaboda. Nagona tobohiyamiyao higa yaku tofaisewa anafaiweya omi'iyao hinaluve'alikadi hinanunauwena tu moya'aimi ami kilagalaga Iya gavehimeyena amine hinaluyabuna, au adi laufata hinavaina." Hidedemi gigahedi.

Yaubada yana ila'a lakahina.

¹²"Tu aimo galulauboda tu Sifi kabi'ona buki ana bulava anavesikisi gigolohina. Auhe'ama badi gili'uli'u lakahina, kadu kauwana gikwauhina vaita avaeka wauyona amine, ada vaikohi givivilina-ma giyabelina vaita dayaga amine. ¹³Kadu ibadibadi babiya hibe'u vaita bolimana-kouko gidamadu be nila bouna gidatafimwanumwanuni amine. ¹⁴"Kadu lobama giyawowola vaita ivi hi'uwana be hisenauwena amine. Kadu oya be himula matatabudi hili'uli'u be hitogadamadama.

¹⁵"Mena gaitomai-dina hilakayemu againe, badi ana tokikaiwabu, badi tovehimeya, badi tolugaviya adi togiyomatana kikaiwabudiyao, badi wakalivadiyao kadu fifiwaladiyao kadu mali kaliva moya'aidi agetoga adi kauve'a buye'i hi'ota be oyeya vatulumeya gouya hiveu. ¹⁶Oya kadu kuga lakahidi agaidiya hikovakova higayo, "Agaimeya wanabe'u be Bana didiga'u'uya givetogana-ma magigina againe wanasevauyema kadu Sifi kabi'ona yana ila'a againe wanasevauyema. ¹⁷^xAu yadi ila'a ana tova lakahina ahe gilakayemu be ama laufata anavaina. Gavaimi be Badi adi'iselu yadi ila'a kada'atuvefa'ileni?"

Yaubada yana tofaisewa gisetagodi.

7 ¹Yaubada yana ila'a yana lakayemu ga'itana tu kadu ga'eno'ita. Lobama ana tovenuwa'ata fowa badi matatabuna himidififina-

^r 6:9 Yo 16:2 ^s 6:10 Ha 16:5-7 ^t 6:11 Ha 3:4-5, 7:9,13-14 ^u 6:12 Md 24:19

^v 6:14 Hi 1:11-12 ^w 6:15 Ais 2:19 ^x 6:17 Ha 14:9-10

ma ga'itadi, ada bolimana matatabuna hihawatadi, yavalata bolimana newalidebola newali'oya be higa keke avaleya o lehageya ginamadu kadu keke tamo ai lukumina ginalewalewa. ²Tovenuwa'ata fowa ga'itadi tu kadu tovenuwa'ata velugana kauwana abalakavine gilaka-ma ga'itana, Yaubada yana abasetagona gi'abina. Badi tovenuwa'ata fowa agaidiya gikova'awafatafata, badi Yaubada gihawahegedi be avala lehaga kadu ai bolimana yadi madu againe hinakivekoyodi-ma kalivai-dina. ³Ygikovadi gigayo, "Keke avala o lehaga o ai wanamadukivekoyodi tu nagona yada Yaubada yana iya'iyaya againe yana tofaisewa deba'aidiya ana'atuvefotana higa anasetagodi." ⁴Gisetagodi-yo adi kilagalaga ganogalina higa mi'Isileli adi yo'o sa'eyana sa'eyana agaidiya kaliva gisetagodi-ma adi ve'atutamoa'aina 144,000 (hanaledi foti fowa tausani).

⁵⁻⁸Yuda ana yo'o agaidiya 12,000 gisetagodi.

Lubeni ana yo'o agaidiya 12,000 gisetagodi.

Gada ana yo'o agaidiya 12,000 gisetagodi.

Asa ana yo'o agaidiya 12,000 gisetagodi.

Nafitalai ana yo'o agaidiya 12,000 gisetagodi.

Manasa ana yo'o agaidiya 12,000 gisetagodi.

Simiyoni ana yo'o agaidiya 12,000 gisetagodi.

Livai ana yo'o agaidiya 12,000 gisetagodi.

Isaka ana yo'o agaidiya 12,000 gisetagodi.

Sebuloni ana yo'o agaidiya 12,000 gisetagodi.

Yosefa ana yo'o agaidiya 12,000 gisetagodi.

Beniyamina ana yo'o agaidiya 12,000 gisetagodi.

Mena yo'o kalivai-dina 144,000 Yaubada yana iya'iyaya againe gisetagodi.

Yo'oyo'o lakahi-mo'edi Yaubada hihawadavadavana.

⁹Tu muliya kadu ga'eno'ita ada auhe'ama yo'oyo'o lakahi-mo'edi matakuya himidi, adi kilagalaga ma keke tamo hakwadi anafata. Badi fafali tulina tulina kadu yo'o tulina tulina hive'inuba, e adi loi tulina tulina meyadi tulina tulina. Yaubada yana didiga'u'u wamagigine kadu Sifi kabi'ona buye matadiya himidimidi. Kaleko kwayakwayana againe hivaigau ada bodaboda didina hi'abi'abina. ¹⁰Ada hikova'awafatafata higayo,

Yada Yaubada didiga'u'uya givetogana-ma
kadu yana Sifi kabi'ona agaidiya
ada kibababala give'inuba.

¹¹⁻¹²Lobama ana tovenuwa'ata matatabudi Yaubada yana didiga'u'u kadu tomiyalobama adi tonagona kadu gaitoma wayawaidi fifiwaladiyao

adivefowa himidififidi. Didiga'u'u wamagigine hi'ibo'ula-mo'a be Yaubada hihawadavadavana higayo,

Yada nuwanuwa hidede amine.
 Yada Yaubada kanadavadavana,
 kanakivekaiwabuyena kanavesiuleyena,
 yana nuwahuya, yana abavehimeya
 yana faiwala fa'ina kanakilakahina.
 E, Bana'e kanave'amohimohinena
 tova inaga inaga keke ana abalauyabu.
 Ehe hidedemi.

Au hidedemi yo'oyo'o matatabu-mo'edi yadi kwelidavadava.

¹³ "Tu tomiyalobama adi tonagona sa'eyana gitoliyeku gigayo, "Badi kaleko kwayakwayane hivaigau-ma badi gaveyao, hami eda hi'ela'ela?"

¹⁴ ^bIya gabonalaufata gagayo, "Kauveya, o uhalamanena."

Ada bana gigayo, "Badi ve'umagigi lakahi-mo'ena hinagene hiyemuyemu. Nuwahinagedi ana vaigau Sifi kabi'ona dayagine hicolana be gikwaya-mo'ena.

¹⁵ ^cAu hidedemi hiyegayega fa'ina,
 Yaubada yana didiga'u'u wamagigine himimiyami
 ada uyadayada be bogi Yaubada yana manuwa
 wese lobameya Bana matane hifififaisewa.
 Ada Bana didiga'u'uya givetogana-ma
 yana lifi lakahina againe give'aiwa'udi.

¹⁶ Keke-mo'a mafu ginalau-havagiledi,
 keke-mo'a agodi ginatana-havagi.
 Kauwana lakahina keke ginakabudi,
 keke kalalava ginakalalavidi.

¹⁷ ^dE, keke tamo vita hinanuhagani fa'ina
 Sifi kabi'ona Yaubada yana didiga'u'u hinafane-mo'ane
 gimimiyami-ma badi yana sifi adi To'itave'avina.
 Gufa miyamiya-vagahina ana guya againe ginaveyudi.
 Ada Yaubada matailudi sa'eyana sa'eyana
 ginaluhegehegena."

Au hidedemi tomiyalobama adi tonagona sa'eyana givenuwa'ataku.

Buki ana bulava vaita autafa amine anaveseveni gigolohina.

8 ¹ Tu Sifi kabi'ona buki ana bulava anaveseveni gigolohina againe, moya'aidi hi'ilova bai hafuna amine amumu gikuluna lobameya.

² Ada lobama ana tovenuwa'ata seveni tova moya'aina Yaubada matane himidimidi-ma ga'itadi, ada badi agaidiya hiulega seveni gifolakedi.

^a 7:13 Ha 7:9 ^b 7:14 Md 24:21; 1Yn 1:7 ^c 7:15 Ais 49:10 ^d 7:17 Ha 21:4; Sam 23:2; Ais 25:8

3-4 ^eKadu tovenuwa'ata velugana giyemu inisenisi ana aba'akabu liline gimidi. Bana inisenisi ana nau'a gola gi'abina. Yaubada vanedimodimo ana egana inisenisi lakahina givelena be higa aba'akabu gola didiga'u'u wamagigine gidadauda-ma againe ginakabuna. Ada vanedimodimo gikabuna-ma Yaubada yana kaliva mahamahalidiyao moya'aidi yadi ve'olola buye give'atutamo'aina, ada siyona wamagana yamumuna ve'ololai-dina buye tovenuwa'ata nimane be gilakalaka Yaubada matane. ⁵Au bana tovenuwa'atai-nadi gina ai'ala'alata atudidiga againe givaina digo inisenisi ana nau'a givemagana au babiya gihegehobuyena. Auhe'ama atala gihegehegena, butuna gilaulauga, nama gisisinamana kadu babi gili'uli'udona.

Tovenuwa'ata seveni hivebutu yadi hiulega hiyuvena.

⁶Tu bana tovenuwa'ata ai'ala'alata babiya gihegehobuyena gihavaina, badi tovenuwa'ata seveni hikidewadewa be higa yadi hiulega seveni hinayuedi. ⁷Bana tovenuwa'ata nagona yana hiulega giyuvena, au wehi kugakugana aisi amine kadu ai'ala'alata dayaga buye give'atutamo'aina-ma babiya gi'alilihiwana. Babi ana tufo tohiye ma ana tufo luhei auwe yamumuna tu ana tufo sa'eyana ma gi'ala-'owona, meda ai kadu isisi'u ana tufo sa'eyana gi'ala-'owona.

⁸⁻⁹^gTu bana tovenuwa'ata anavelu yana hiulega giyuvena, au gaitoma vaita oya lakahi-mo'ena gi'ala'alata-ma lehageya givelusefuyena. Lehaga ana tufo tohiye ma ana tufo luhei auwe yamumuna tu ana tufo sa'eyana ma givedayaga, meda lehaga ana igana ana tufo sa'eyana hi'alika kadu waka ana tufo sa'eyana hikamomola.

¹⁰⁻¹¹Tu bana tovenuwa'ata anaveto yana hiulega giyuvena, au badibadi lakahina vaita daki giyabeyabela-ma amine lobameya gi'akakilina be gufa lakahidi kadu guya agaidiya gihobu. Gufa guya ana tufo tohiye ada ana tufo luhei au yamumuna tu ana tufo sa'eyana ma givegolagola ada kaliva tufoidi moya'aidi gufai-nadi hiyuna-ma hi'alika. Mena badibadi ana egana Golagola.

¹²Tu bana tovenuwa'ata anavefowa yana hiulega giyuvena, au kauwana vaikohi ibadibadi hi'uyuyu. Kauwana ana tufo tohiye ma ana tufo luhei auwe yamumuna tu ana tufo sa'eyana ma gi'uyuyu. Meda anafaiweya vaikohi kadu ibadibadi adi tufo sa'eyana hi'uyuyu. Uyadayada ana tufo sa'eyana keke tamo mahalina kadu bogi ana tufo sa'eyana keke tamo mahalina.

¹³^hIya galulauboda tu manubutu sa'eyana lobama hinafane giyaveyavega-ma agona ganogalina, gikova'awafatafata gigayo, "Hoiyoi! Hoiyoi! Omi tomiyababi hoiyoi! Badi lobama ana tovenuwa'ata tohiye

aimo himimiyami-ma sa'eyana sa'eyana yadi hiulega hinayuvena againe, vita koyo-mo'ena tulina tulina agaimiya ginalakayemu.” Au hidedemi manubutu gigahe.

Hiulega anavefaifi ana aiyuve fa'ina.

9 ¹Tu bana lobama ana tovenuwa'ata anavefaifi yana hiulega giyuvena, au kaliva sa'eyana ana ita vaita badibadi sa'eyana lobameya gi'akakilina-ma babiya gihobu'ela. Bana balauma yadi abaga ana kihi givaina, abagai-nadi ana egana Kahu Tunugi-vadavada'aina. ²Kahu giyauna againe, siyo lakahina gilaka vaita ubula lakahi-mo'ena siyona amine. Siyo Kahuya gilaka-ma againe kauwana kadu lobama gi'uyuyubodena. ³Ada siyo-nadi hinagene koloma lakahidiyao babiya hihobu, ada faiwala tulina hivaina be yadi aiyovaga vaita atagikwamana amine. ⁴Yaubada yana vehimeya againe adi hawata hivaina higa isisi'u ai a'a gikabukabu-ma keke hinakivekoyoni, tu adi vehimeya ma badi kaliva Yaubada yana iya'iyaya deba'aidiya keke gidadauda-ma hinakivekoyodi. ⁵Keke gidahawahegedi be hinaluve'alikadi, au vaikohi faifi agaidiya yadi aiyovaga againe aulolo lakahina hinaveledi. Ada aulolo lakahi-mo'ena againe hivedivediwe vaita atagikwamana kaliva giyovana be givedivediwe amine. ⁶Medema vaikohi faifi agaidiya alika hinalelena tu hinalele-wayoga keke adifata. Hinagahe hinagayo, “Hoi! Hima kavedivediwe kada'alika.” Hidedemi hinagahegahe tu Yaubada keke alikeya ginahawahegedi.

⁷Tu mena kolomai-dina adi ita ma vaita hosi gaviya fa'ina hivevigauna-ma amine. Badau kikaiwabuna gola u'udiya hisedi ada magigidi ana ita vaita kaliva magigidi ana ita amine. ⁸U'udi vaita vevine u'udi tunugina amine, nigodi sinasinahina vaita laiyni manimaninina nigona amine. ⁹Manawadi ana vaigau vaita abaseboda kainumula amine, ofadi butuna vaita ubula lakahina giluluvetaveta'ala-ma amine. ¹⁰Giudi ana wagiyo vaita atagikwamana amine, ada mena giudi againe kaliva hina'liyovaga be aulolo lakahina againe hinavedivediwe vaikohi faifi agaidiya. ¹¹Kadu bana Kahu Tunugi-vadavada'aina ana tokaiwabu meda badi kolomai-dina adi tokaiwabu. Bana ana egana bona Hibeliu againe ma Abadoni tu bona Gilika againe Afoliyoni. (Egana ana kaivila ma Toluyaweyawela.)

¹²^kVita nagona manubutu givehoiyoiyena-ma ahe'i, tu vita luhei ma aimo hinayemu.

Hiulega anavesikisi ana aiyuve fa'ina.

¹³Tu bana lobama ana tovenuwa'ata anavesikisi yana hiulega giyuvena, au ago'ago sa'eyana ganogalina, inisenisi ana aba'akabu gola

i 9:3 Yem 10:12 j 9:4 Ha 6:16 k 9:12 Ha 8:13

hukuna fowa againe giyemu. Mena aba'akabu Yaubada yana didiga'u'u wamagigine gidadauda. ¹⁴Bana agona ganogalina-ma tovenuwa'ata anavesikisi yana hiulega gi'abina-ma againe gigahe gigayo, “Badi tovenuwa'ata fowa boi hiyogodi be gufa lakahina ana egana Yufalete againe himimiyami-ma unayaudi be hinana.” ¹⁵Au badi tovenuwa'ata fowa boi hida bai-nadi, hida aiyetai-nadi, hida vaikohi-nadi, hida malamalai-nadi fa'ina Yaubada yana vehimeya againe hikidewedewedi be hisedi amanadi giyaudi be higa kaliva tufoidi moya'aidi hinaluve'alikadi. Tomiyababi adi tufo tohiye ma adi tufo luhei auwe yamumuna tu adi tufo sa'eyana ma hiluve'alikadi. ¹⁶Badi tovenuwa'ata fowa tolugaviya hosi agaidiya hiyage-ma moya'ai-mo'edi hinagoyedi, adi kilagalaga ganogalina 200 miliyoni (200,000,000).

¹⁷⁻¹⁸Kadu'e yaku eno'ita againe badi tolugaviya yadi hosi agaidiya hiyage-ma ga'itadi, adi ita ma hidede amine. Manawadi ana abaseboda ana ita yabeyabeli-mo'ena vaita ai'ala'alata amine kadu matamatagina vaita lehaga amine kadu yagoyagona vaita luwaluwa boyalina amine. Hosi u'udi ana ita vaita lai yoni u'udi amine ada ai nolana siyo kadu gaitoma yagoyagona alamatafailina magana koyo-mo'ena awadiya giyemuyemu, ada mena aba'alikai-dina agaidiya tomiyababi adi tufo sa'eyana hiluve'alikadi. ¹⁹Badi hosi yadi wafaiwala, u'udiya kadu giudiya kaliva hiluluve'alikadi fa'ina giudi wa'u'una vaita oloto amine ada medema againe kaliva hi'liyovaga.

²⁰^mTu tomiyababi velugadiyao keke mena vitai-dina agaidiya hida'alika-ma nimadi ana aibubuna ana hawadavadava aimo keke hidavenikohiyeni. Keke Yaubada againe hidahagaviladi. Au Setani yana yo'o higa balauma agaidiya hihawahege-vagahidi kadu ikilukiluma gola, siliva, kofa, kuga, kadu ai agaidiya hibubudi-ma aimo hihawadavadavana. Mena ikilukilumai-dina keke adifaiweya hida'ita o hidanogala o hidanaudadana. ²¹Kadu badi kaliva yadi luve'alika yadi kwelikweli yadi udo yadi kai'afu au hida yadi huluvai-dina keke hidavenikohiyeni-yo Yaubada againe hidahagaviladi.

Lobama ana tovenuwa'ata be buki uwa'uwana kabi'ona kahihina.

10 ¹Kadu'e ga'eno'ita be tovenuwa'ata kikaiwabuna lobama amine gihobuhobu'ela-ma ga'itana. Buhibuhi againe givaigau ada u'una getane bowa gidonena. Magigina ana ita vaita kauwana amine kadu agena ana ita vaita ogola i'ala'alahina amine. ²⁻³Buki uwa'uwana kabi'ona luluyagilina gi'abina. Agena i'atagina lehageya gisena tu i'imawana avaleya gisena, ada gikova'awafatafata agona vaita gufa lakahina gihobu-ma butuna amine. Gikova'awafatafata againe atalai-dina

¹ 9:15 Ha 8:7-12 ^m 9:20 Ha 16:9,11; Sam 135:15-17

seveni agodi gilakayemu. ⁴Ada atala seveni higahe againe, yadi gahe gada'etoladina ma tamo hakwadi agona lobameya ganogalina gigayo, “Badi atalai-dina seveni yadi gahe unasevauyena keke una'etoladini.”

⁵⁻⁶Tu bana tovenuwa'ata lehageya be avaleya givagahalalalala be ga'itana-ma nimana i'atagina lobameya gikilakahina be gikova gigayo, “Yaubada gihalamaneku tu gagahegahe, Bana'e Tomiya-vagata lobama be avala be lehaga adi gaitomai-dina matatabudi buye'i gibubudi amanadi ana eganeya gagahe. Boda ana tova a gihavaina. ⁷Tu lobama ana tovenuwa'ata anaveseveni yana hiulega ginayuvana ana toveya, Yaubada yana nuwanuwa sevasevauyana ginafaisewa-'owona boi tuwai-mo'ena yana tofaisewa bonana ana to'awatalatalaina agaidiya gihawavemogatalena amine.” Hidedemi tovenuwa'ata buki gi'abina-ma gigahe.

⁸Gigahe-yo ago'ago lobameya ahe ganogalina-ma kadu gigahe-havagileku gigayo, “Una tovenuwa'ata nimane buki luluayagilina gidadauda-ma uvaini, bana lehageya be avaleya givagahalalalala amanadi.” ⁹Au gana tovenuwa'ata againe gave'o'ola higa buki uwa'uwana kabi'ona gidaveleku. Ma gigaheku gigayo, “Uvaini be u'ani. Awaniya ana digadigaga vaita ma'awa gufadi amine tu muliya kamoniya ginavegolagola.” ¹⁰Au buki kabi'ona tovenuwa'ata nimane gavaina be ga'ana. Ana digadigaga awakuya vaita ma'awa gufadi amine tu ahe gatonona againe kamokuya givegolagola. ¹¹Au higaheku higayo, “Unana Yaubada yana venuwa'ata yo'o moya'aidi adi tokikaiwabu buye'i fa'idiya kadu una'awatalatalaina-havagi. Badi yo'oi-dina meyadi tulina tulina kadu fafali tulina tulina agaidiya himimiyami.” Hidedemi higaheku.

Yaubada yana to'awatalatalaina adi'iselu kahihidi.

11 ¹Tu aiwala giveleku vaita aba'etowava amine ada gigaheku gigayo, “Unana Yaubada yana manuwa-tafalolo kadu yana atudidiga una'etowavana, kadu tohavadavadava unahawadi. ²Manuwainadi ala gimidififina tu melala ala hinagene ma keke una'etowavani, fa'ina Yaubada badi keke miYuda tu yo'o tulidiyao mena melalai-nadi giveledi. Tu Yelusalema yaku melala mahamahalina ma vaikohi 42 agaidiya hinavehimeyena be gaitoma moya'aidi hinaluyaweyawelidi. ³Tu yaku to'awatalatalaina adi'iselu ganafaiwalaveledi be yaku venuwa'ata hina'awatalatalainena hinanunauwena aiyeta 1,260 higa vaikohi 42 agaidiya. Adi vaigau koyona vaita kofala baiki amine hina'osena, medema kaliva yadi koyona fa'ina hitagitagi-ma ana iya'liyaya.”

⁴Tu badi to'awatalatalaina adi'iselu ma anafaiweya ai ana egana olive luhei kadu lamufa ana abasewadi luhei babi ana Kaiwabu

ⁿ 11:2 Lu 21:24; Ha 13:5 ^o 11:4 Sak 4:11,14

matane himidimidi amanadi. ⁵Ka'i tamo hakwadi ginagalualuva be ginakivekoyodi, au ai'ala'alata awadiya ginayemu be nibaidiyao gina'ala'owodi. Hai kaliva nuwanuwana ginakivekoyodi, medema makewa'e hidede amine gina'alika. ⁶Kadu badi kalivai-dina adi'iselu vaikohi 42 agaidiya Yaubada yana venuwa'ata hina'awatalatalaina ana toveya yadi faiwala hidede amine. Adifaiweya hinagahe be lobama gina'abodana be keke wehi ginalugaga. Kadu tova a gavaiyehi nuwanuwadi amine, adifaiweya hinagahe be gufa hinavedayaga, kadu vita koyodi tulina tulina babiya hinaseyemaunedi.

^{7p}Tu badi Yaubada yana venuwa'ata hina'awatalatalaina ginahavaina, kaliva sa'eyana vaita kevakeva manimaninina amine Kahu Tunugi-vadavada'aina againe ginalakayemu be buye hinave'amunumunuga. Bana kevakeva manimaninina ginafaiwalahegedi be ginaluve'alikadi. ⁸Wowodi melala lakahina ana egana Yelusalema ana edeya hinase-kawowona, melalainadi againe tuwaina yadi Kaiwabu hikivekelosena. Mena melala gahe sevasevauyana againe hivewagana Sodoma kadu Idifita. ⁹Aiyeta tohiye kadu hafuna agaidiya kaliva moya'aidi hina'ela wowodi hina'itakwanekwanena be adi aitauna hinahawatana. Badi kalivai-dina adi loi tulina tulina kadu adi yo'o tulina tulina, meda meyadi tulina tulina kadu yadi fafali tulina tulina agaidiya hinatauya be hina'ela. ¹⁰Tomiyababi kaliva adi'iselu yadi alika fa'ina hinagakahikahi, hinavemwamwala be nuwakabubu hinave'atunevedavedama, fa'ina mena Yaubada bonana ana to'awatalatalaina adi'iselu aulolo lakahina tomiyababi hiveledi-yo hivedivediwe lauva tunugina.

¹¹Aimo ga'eno'eno'ita tu aiyeta tohiye kadu hafuna gihavaina againe, Yaubada yawaina badi agaidiya giya'avedamana be himididi-mo'a. Ada badi hi'itadi-ma himatautave'ine. ¹²^qAu kaliva adi'iselu ago'ago lakahina lobameya hinogalina, gikovadi gigayo, "Walaka'ela we'ai." Ada buhibuhi againe lobameya hilakalaka tu nibaidiyao hilulubodedi.

¹³Lobameya hiluku tu auhe'ama babi gili'uli'u toyogi-mo'ena ada kaliva seveni tausani (7,000) hi'alika. Hida melalai-nadi ana tufo teni ada naeni auwe yamumuna tu ana tufo sa'eyana againe manuwa hibe'u. Badi li'uli'u againe wayawaidi himimiyami-ma himatautave'ine be Yaubada lobameya yana faiwala fa'ina hidavadavana.

¹⁴^rVita anavelu manubutu givehoiyoyena-ma ahe'i, tu vita anaveto kabisona ginalakayemu.

Hiulega anaveseveni ana aiyuve fa'ina.

¹⁵^sTu bana lobama ana tovenuwa'ata anaveseveni yana hiulega giyuvena, au ago'ago lakahidi lobameya hikovakova higayo,

¶ 11:7 Ha 13:1 ¶ 11:12 2Kin 2:11 ¶ 11:14 Ha 9:12 § 11:15 1Ko 15:24-25; Ha 19:6; Dan 7:13-14

Tova adamoya yada Kaiwabu kadu yana Tovegida Keliso
 abavehimeya babi againe hivai-havagilena,
 ada tomiyababi hinavehivehimeyedi tova inaga inaga
 keke ana abalauyabu.

¹⁶ 'Hidedemi higahe-yo tomiyalobama adi tonagona tuweniti-fowa yadi
 didiga'u'uya Yaubada matane hivetogadi-ma hi'ibo'ula-mo'a be Yaubada
 hihawadavadavana higayo,

¹⁷ "O Yaubada Kaiwabu Tofaiwala-mo'a,
 tuwaina umiyami be ununauwena tu
 adamoya aimo umiyamiya-vagata.
 O againiya avesivesiule fa'ina
 ya faiwala lakahina uvai-vagahina
 be uebutu uvehivehimeya.

¹⁸ Yo'o moya'aidi O againiya hi'ago'uga
 fa'ina ya ila'a ana tova a gilakayemu
 be to'alika unavedewayaugidi.
 Kadu ya tofaisewa bona ana to'awatalatalaina
 adi laufata ana tova a giyemu.
 Meda ya kaliva mahamahalidiyao
 kadu gaveyao a egana hive'amohimohinena
 lakahidiyao kadu kabi'odiyao,
 medema adi laufata ana tova a giyemu.
 Tu badi tomiyababi hiluyaweyawelidi-ma
 adi veluyayaula ana tova a gilakayemu.

Au hidedemi tomiyalobama adi tonagona yadi kwelidavadava.

¹⁹ Kadu'e ga'eno'eno'ita tu matakuya Yaubada yana manuwa-tafalolo
 lobameya hiyauna, ada manuwa hinagene Yaubada yana veyao ana
 bokesi ga'itana. Auhe'ama nama gisisinamana, butuna gilaulauga, atala
 gihegehegena, babi gili'uli'u, wehi kugakugana vaita aisi amine gi'alilihi
 wana.

Kwamayoku be wayo'o fifiwalana kahihidi.

12 ¹ Kadu'e ga'eno'ita tu iya'iyaya lakahina kadu yaulyaulowogina
 lobameya gilakayemu, higa kwamayoku kauwana againe
 givaigau ada vaikohi tabone gimidimidi. Badau kikaiwabuna ibadibadi
 tuwelo buye hikivefotadi-ma u'lune ga'itana. ² ^v Bana wahifugana ada
 givefahena fa'ina yana aulolo giyemu againe gitatawayana. ³ ^w Au kadu
 iya'iyaya velugana lobameya gilakayemu, higa wayo'o abokakaina
 yabeyabelina u'luna seveni ana siko seveni kadu badau kikaiwabuna
 seveni meda u'luna seveni agaidiya gidadauda-ma ga'itana. ⁴ Giuna againe

† 11:16 Ha 4:4,9-10 u 11:17 Ha 1:8, 20:11-13; 2Ko 5:10 v 12:2 Sam 2:9 w 12:3 Yo 14:30

ibadibadi tufoidi moya'aidi gilukakikakidi be babiya hibe'u. Ibadibadi adi tufo tohiye ma adi tufo luhei auwe yamumudi tu adi tufo sa'eyana ma babiya gihegehobuyena. Bana wayo'o-nadi kwamayoku kabisona ginavenatuna-ma wamagigine gimidi be higa kwamana ginatubuga digo auhe'ama ginatonona. ⁵Au hivenatuna natudi kaliva, Bana'e aimo yana wafuluma kainumula yo'o tulina tulina gina'itave'avidu amanadi. Wayo'o-nadi kwamana gidatonona ma tamo hakwadi gilemana be Yaubada againe kadu yana didiga'u'u buye againe ginauwena. ⁶Badi kwamayoku ma babigaga againe hi'ota, abaga sa'eyana badi fa'idiya boi Yaubada gikidewedewena-ma againe hina. Medede againe aiyeta 1,260 agaidiya gina'ita'itave'avidu.

⁷Kwamayoku hi'ota be hina tu gaviya lobameya gilakayemu. Lobama ana tovenuwa'ata kikaiwabuna ana egana Maikeli yana yo'o ginagoyedi be wayo'o yana yo'o tomiyalobama buye hive'amunumunuga. ⁸Lobama ana tovenuwa'ata Maikeli ginagoyedi-ma wayo'o hifaiwalahege-mo'ena, ada Yaubada bana wayo'o yana yo'o buye yadi abaga lobameya gilemadi be giwavidu. ⁹Bana wayo'o abokakaina babiya gihegehobuyena, bana'e ma oloto tuwaina hivesagana Diyabolo yo Setani, tomiyababi matatabudi koyona againe ginuwa'abiyedi-ma kalivai-nadi. E, bana'e babiya hihegehobuyena kadu yana yo'o tomiyalobama buye'i.

¹⁰Setani babiya hihegehobuyena tu ago'ago lakahina lobameya ganogalina gikova gigayo,

Adamoya yada Yaubada gikibababaleda,
 Yada Tokaiwabu yana faiwala gi'livemogatalina
 be yana itave'avina againe kamimiyami.
 Adamoya yana Tovegida Keliso
 yana abavehimeya giseyemaunena.
 Setani babiya hihegehobuyena,
 boi uyadayada be bogi tobohiyadeyao
 Yaubada matane gihawavekoyoye-kawowodi.

¹¹ "Bana'e Sifi kabi'ona dayagina gimadu fa'ina
 tobohiyadeyao Setani hifaiwalahege-mo'ena
 Kadu yadi yegayega Yesu dayagine
 mali kaliva agaidiya hi'awatalatalainena
 fa'ina Setani hifaiwalahege-mo'ena,
 yawaidi keke hidanuwaloloneni
 au alikeya hihawahegedi.

¹² Yaubada gifaiwalahegahega-mo'a fa'ina
 omi tomiyalobama wanavemwamwala.
 Tu hoiyoi, omi tomiyababi tomiyalehaga

x 12:7 Yu 1:9 y 12:9 Aba 3:1; Ha 20:2-3 z 12:10 Yob 1:9-11; Sak 3:1 a 12:11 Yo 1:7

fa'ina Setani agaimiya gihobu'ela.
 Ila'a givemagana be vita ginavelemi
 fa'ina gihalamanena yana tova a gikali'uhō.

Au hidedemi ago'ago lobameya gigāhe.

¹³Tu bana wayo'o-nadi bābiya hihegehobuyena ma tauna gi'itana againe, kwamayoku kwamana kaliva hivenatunena-ma givenegadi.
¹⁴Gidakive'avidī ma Yaubada manubutu ofana luhei kwamayoku givedi be higa abaga babigaga againe badi fa'idiya gikidewedewena-ma againe adifaiweya hinamadu'ota. Medede againe malamala tohiye kadu hafuna agaidiya gina'ita'itave'avidī be bana wayo'o-nadi keke anafaiweya ginamunudi. ¹⁵Au wayo'o awana gila'ana ada gufa lakahina gi'ahiwahiwana be higa kwamayoku ginave'alugedi.
¹⁶Tu bābi kwamayoku givelugadi. Bābi gi'ayavalina be gufa wayo'o awane gi'alāhiwagena-ma bābi giyuna. ¹⁷^bAu wayo'o kwamayoku agaidiya gi'ago'uga-mo'a ada gitauya be natudiyao velugadiyao agaidiya ginalulugaviya. Badi kalivai-dina Yaubada yana vehimeya hi'ita'itave'avina kadu nuwanuwa velemono'ena Yesu gi'awatalatalainena-ma againe hiluluve'avina. ¹⁸Au wayo'o gina taliyeya gimidi tu gibodaboda.

**Kevakeva manimaninidiyao adi'iselu kahihidi.
 Sa'eyana lehageya giyemu.**

13 ¹Bana kaliva vaita wayo'o amine ma taliyeya gimidimidi tu kadu kaliva sa'eyana ana ita vaita kevakeva manimaninina lehageya gi'alakahina-ma ga'itana. Kevakevai-nadi u'una seveni kadu ana siko teni, ada siko sa'eyana sa'eyana agaidiya badau kikaiwabuna hidadauda. Kadu u'una sa'eyana sa'eyana agaidiya egana koyodi hidadauda, eganai-dina Yaubada hihawatagona. ²Kevakeva manimaninina ga'itana-ma ana ita vaita fusi walawala'a abokakaina ana egana lefadi amine, tu agena vaita kevakeva koyona ana egana beya agena amine, ada awana lakahina vaita laiyoni awana amine. Bana wayo'o yana faiwala yana didiga'u'u yana abavehimeya lakahina kevakevai-nadi manimaninina againe gisedamanena. ³Bana kevakeva u'une vaita ki'ona gidadauda, higa boi gi'alika tu kadu gimididi-havagi. Tomiyababi moya'aidi yana mididi-havagi fa'ina hiyaulowoga be yana vehimeya hi'itavaina. ⁴Bana wayo'o yana abavehimeya kevakeva manimaninina againe gisedamanena fa'ina, kaliva wayo'o hihawadavadavana kadu kevakeva manimaninina hihawadavadavana higayo, "Mene tamo hakwadi kevakeva manimaninina amine? Keke tamo hakwadi anafaiweya bana againe ginalaugaviya, keke-mo'a."

^b 12:17 1Fi 5:8 ^c 13:1 Ha 17:3,7,12

⁵Tu vaikohi 42 agaidiya Yaubada kevakeva manimaninina gihawahegena be giseselakalaka kadu Yaubada gihawahawatagona, ada yana wa'abavehimeya gififaisewa. ⁶Nuwanuwana tauna ginakilakahina vaita Yaubada amine fa'ina givebutu Yaubada Tauna gihawatagona, Yaubada ana egana kadu yana abamiyami kadu yana kaliva tomialobama gi'ihawadamanedi. ⁷^dYaubada gihawahegena be yana kaliva mahamahalidiyao agaidiya ginalugaviya be ginafaiwalahege-mo'edi. Ada yo'o tulina tulina ginavehivehimeyedi, adi loi tulina tulina meyadi tulina tulina yadi fafali tulina tulina. ⁸^eTomiyababi tufoidi moya'aidi kevakevai-nadi manimaninina hinahawadavadavana, higa gaveyao moya'aidi Sifi kabi'ona yana buki againe adi egana keke gida'etoladini, medema hinahawadavadavana. Buki-nadi Sifi kabi'ona yana buki, Bana'e tuwai-lokalokana Yaubada aimo babi keke gidabubuni ana toveya yana vevai againe alika ginanuhagana amanadi. Ada buki againe badi wayawai-vagahidi adi egana gidadauda.

⁹Omi watagami, wananogala. ¹⁰^fHai kaliva Yaubada ginahawahegena be Keliso fa'ine deliya ginaluku, medema makewa ginaluku. Hai kaliva Yaubada ginahawahegena be Keliso fa'ine fetu againe alika ginanuhagana, medema makewa gina'alika. Hidema fa'ina omi Yaubada yana kaliva mahamahalimiyao yami wa'asevatu wana'atuvefa'ila, yami vetumagana wanakidonena.

Kevakeva kadu sa'eyana babiya giyemu.

¹¹Kadu'e ga'eno'ita tu kevakeva manimaninina velugana babiya giyemu-ma ga'itana. Ana siko luhei vaita sifi kabi'ona ana siko amine tu agona ma fifiwalana vaita wayo'o amine. ¹²Bana kevakeva manimaninina nagona yana abavehimeya matatabuna bana kevakeva manimaninina anavelu againe gisedamanena, ada loseyanina amine tomiyababi moya'aidi givehivehimeyedi. Giluluya'aya'alidi be kevakeva manimaninina nagona hihawadavadavana, bana gi'alika tu gimididi-havagi ma kalivai-nadi. ¹³^gKadu iya'iyaya lakahidi be yauyaulowogidi gififaisewadi, e yana faiwala againe ai'ala'alata lobameya gisehobuyena kaliva moya'aidi matadiya. ¹⁴Bana kevakeva manimaninina anavelu bana kevakeva manimaninina nagona ana eganeya mena iya'iyaya yauyaulowogina gififaisewana, fa'ina yana ve'alololoya tomiyababi ginuwa'abiyedi. Kadu givehimeyedi gigayo, "Ikilukiluma bana kevakeva manimaninina nagona boi fetu againe gi'alika tu gimididi-havagi ma ana ita amine wanabubuni-yo wanakivemididina be againe wana'ibo'ula." Hidedemi gigahe. ¹⁵Hibubuna gihavaina, Yaubada gihawahegena fa'ina kevakeva manimaninina anavelu yawaina

^d 13:7 Ha 11:7 ^e 13:8 Ha 3:5, 20:12 ^f 13:10 Ha 14:12 ^g 13:13 Md 24:24

ikilukilumai-nadi againe giya'avedamana, ada mena ikilukiluma ana ita vaita kevakeva manimaninina nagona amine ma anafaiweya gilulukahihi kadu yana vehimeya againe gaveyao moya'aidi ikilukiluma ana hawadavadava hidibutoyogena-ma hiluve'alikadi. ¹⁶Kadu kaliva moya'aidi giluya'aya'alidi, lakahidiyao be kabi'odiyao, wakalivadiyao be koyokoyodiyao, agetoga yadi kauve'a buye'i giluya'aya'alidi be iya'iyaya sa'eyana i'atagidiya o ka'i deba'aidiya hivaina. ¹⁷^hBadi gaveyao iya'iyayai-nadi keke hidavaini, medema keke adifaiweya lokoloko hidakimomeni o hidakimonevedamaneni. Mena iya'iyaya amanadi kevakeva manimaninina nagona ana egana o ka'i bana ana egana ana naba.

¹⁸Tobohiyakweyao, gilubodami be yami wanuwahuya mena gaitomai-nadi wanuwenuwena. Kevakeva manimaninina ana naba vaita gahesevauya amine. Ana naba 666. Hai kaliva halamanina, medema gahesevauya ana kaivila fa'ina anafaiweya gidanuwanuwa be egana-mo'ena gidanuhagana. Mena eganai-nadi kevakeva manimaninina ana egana tu egana ana nogala ma vaita kaliva ana egana amine.

Sifi Kabi'ona yana kalivamomo buye himiyami oya Saiyoni.

14 ¹Kadu'e ga'eno'ita tu auhe'ama Sifi kabi'ona mene matakuya ga'itana, Bana oya Saiyoni kabune gimidimidi, oyai-nadi Yelusalema hinagene gidadauda. Kadu badi kaliva 144,000 Sifi kabi'ona buye himidimidi, deba'aidiya Bana ana egana kadu Tamana ana egana kilukilumina gidadauda. ²^jAda ago'ago lobameya ganogalina, ana nogala vaita gufa lakahina gihobuhobu-ma amine, kadu vaita atala gihegena toyogina ma amine. Ago'ago ganogalina-ma kadu ana nogala vaita yo'o lakahidi hikwelikweli tu yadi kweli ana aba'iveyamumu vaita kita haghagina amine hilaulauna. ³^kMena yo'oi-dina kaliva 144,000 Yaubada yana didiga'u'u wamagigine kadu gaitoma wayawaidi fifiwaladiyao adivefowa be tonagona lakahidiyao matadiya himidimidi tu kweli ivaguna hikwelikweliyena. Kweli-nadi keke tamo hakwadi anafaiweya ginanogalavaini, au badi kaliva 144,000 gagana hihalamanena. Badi kalivai-dina Yaubada babi ana koyona againe gitutuehobudi. ⁴^lYadi dewa haghagi-mo'ena Yaubada matane. Kaliva vavinediyao keke hidahegedi-yo mali vevine hidakeleleyedi amine, badi kaliva 144,000 keke Yaubada hidahegeni-yo mali yaubada agaidiya hida'odu'odu. Ha'amine ha'amine Sifi kabi'ona ginanauna, badi hivebwa'uliyena. Yaubada tomiyababi adi yo'o agaidiya gitutuehobudi ada Yaubada kadu yana Sifi kabi'ona badi kalivai-dina vaita bavagu amine hinuhagadi. ⁵Kadu badi kalivai-dina keke tamo fwaya awadiya gidayemuyemu, au adi vita keke.

^h 13:17 Ha 14:9-11 ⁱ 14:1 Ha 3:12 ^j 14:2 Ha 1:15 ^k 14:3 Ha 7:4 ^l 14:4 Ye 1:18

Lobama ana tovenuwa'ata adi'itoto kahihidi.

⁶Kadu'e ga'eno'ita tu lobama ana tovenuwa'ata sa'eyana lobama hinafane giyaveyavega-ma ga'itana. Bana Yaubada yana Venuwa'ata Yamumuna miyamiya-vagahina gi'aliyena be tomiyababi agaidiya gina'awatalatalainena. E, fafali tulina tulina kadu yo'o tulina tulina agaidiya gina'awatalatalainena, kaliva meyadi tulina tulina, adi loi tulina tulina. ⁷Bana tovenuwa'ata gikova'awafatafata gigayo, “Yaubada wanamatausena kadu wanakivekaiwabuna, fa'ina yana vedewayauga ana tova a gilakayemu. Bana'e lobama, babi, lehaga, guya gibubudi-ma wanahawadavadavana.”

⁸“Tu tovenuwa'ata anavelu tobohiyana muline giyemu gikova gigayo, “Babiloni hida hima melala lakahina hiluyawelina, hiluyaweli-mo'ena. Melalai-nadi ana dewa koyona ada nuwanuwa ita'italuvadigana yo'o tulina tulina kalivai-dina nuwadi gi'abina be melalai-nadi againe hiluku. Wa'ita, kwamayoku kaliva higayena be gufa laulaugina hiveyuni-yo givekwavakwava tu buye hi'udo amine, meda kaliva moya'aidi melalai-nadi againe udo tulina tulina agaidiya hihawahegedi.”

⁹⁻¹⁰“Tu tovenuwa'ata anaveto tobohiyaneyao mulidiya giyemu gikova'awafatafata gigayo, “Gava kaliva kevakeva manimaninina be ana ikilukiluma ginahawadavadavadi kadu yana iya'iyaya deba'aine o i'atagine ginavaina, kadu medema Yaubada yana ila'a ana gowa ginayuyena. E, kaliva oine uyonaga gihiwana amine, Yaubada yana ila'a keke-mo'a ginakivetuluni, au mena kaliva koyodiyao yana ila'a toyoginaga hina'ayaunena. Kadu lobama ana tovenuwa'ata mahamahalidiyao matadiya kadu Yaubada yana Sifi kabi'ona matane gaitoma yagoyagona alamatafifailina giyabeyabela-ma againe aulolo keke kabi'ona hinanuhagani-yo hinavedivediwe. ¹¹Mena ai giyabeyabela-yo aulolo hinuhagana-ma ai-nadi siyona gilutowamididiyena tova inaga inaga keke ana abalauyabu. Medema fa'ina gaveyao bana kevakeva manimaninina kadu ana ikilukiluma buye hihawadavadavadi o ka'i ana egana ana iya'iyaya hivaina, medema yadi aulolo keke-mo'a gida'aloveni. E, uyadayada be bogi hivedivediwe-vagata.” Hidedemi tovenuwa'ata anaveto gigahe.

¹²“Tu badi kevakeva manimaninina ana hawadavadava againe mena aulolove'ine hinanuhagana fa'ina, omi Yaubada yana kaliva mahamahalimiyao yami wa'asevatu wana'atufefa'ila, omi Yaubada yana vehimeya wa'ita'itave'avina kadu yami vetumagana Yesu againe wakidonena-ma kalivai-mina.

^m 14:8 Ha 18:2-3 ⁿ 14:9-10 Ha 13:11-17, 19:20, 20:10,15, 21:8 ^o 14:12 Ha 13:10

¹³ ^pAu ago'ago lobameya ganogalina gigaheku gigayo, “Hidedemi u'etoladini. Adamoya kadu ginanunauwena gaveyao Kaiwabu againe hinamiyamiyave'avina tu hina'alika, yadi vemwamwala gavatuluga!”

Ada Bana Yaubada Alu'aluwana gi'alakakila gigayo, “Wona velemona, au yadi faisewa ana wavita againe hinaveyawai tu guwana lobameya hinanauwena be moya'aidi matadiya adi laufata haghagina hinanuhagana.”

**Lobama ana tovenuwa'ata tomiyababi hivaidi
be adi laufata hinanuhagana.**

¹⁴ ^qKadu ga'eno'ita tu mene matakuya buhibuhi kwayakwayana ga'itana, ada buhibuhi againe kaliva sa'eyana givetogana ana ita vaita Bana'e givekaliva-ma amine. Badau kikaiwabuna gola u'une gidadauda kadu ilama tubu'oduna sinasinahina gi'abina. ¹⁵ ^rAu kadu tovenuwa'ata velugana manuwa-tafalolo againe gihobu ada Bana buhibuhi againe givetogana-ma againe gikova'awafatafata gigayo, “Gaitoma moya'aidi babiya giboyalidi fa'ina yaudi ana tova ahe gilakayemu. Au ya ilama tubu'oduna uvaini be utalaga.” ¹⁶ Hidedemi gigahe-yo Bana buhibuhi againe givetogana-ma yana ilama tubu'oduna babiya giwainena be yana kaliva vaita hiboyala-ma giyaudi.

¹⁷ Kadu'e tovenuwa'ata velugana manuwa-tafalolo lobameya gidadauda-ma againe gihobu ada kadu bana ilama tubu'oduna sinasinahina gi'abina. ¹⁸ Kadu tovenuwa'ata sa'eya-mo'ena manuwa-tafalolo ana atudidigeya gitauya, bana atudidiga ana ai'ala'alata ana tovehimeya ma kalivana, gihobu be bana tovenuwa'ata ilama tubu'oduna sinasinahina gi'abina-ma againe gikova'awafatafata gigayo, “Gava babiya kelefhi hiboyala fa'ina, ya ilama uvaini be utalaga-yo oine hinabubuna.” ¹⁹ ^sAu bana tovenuwa'ata yana ilama tubu'oduna babiya giwainena digo babi ana kelefhi giyaudi au kelefhi ana abavagafuwafuwa againe ginauwedi be giselukuwedi. Mena abavagafuwafuwa vaita Yaubada yana ila'a ana abanauhaga, ada medema againe tomiyababi Yaubada yana ila'a hinanuhagana. ²⁰ Mena abavagafuwafuwa melala lakahina wakwaune gidadauda ada medede againe kelefhi hivagafuwafuwadi. Hivagavagafuwafuwadi tu tomiyababi dayagidi gimadumadu gimadumadu tu gituwa yana laka badi miGilika yadi etowava amine 1,600 sitediya, higa vaita 300 kilomita amine. E, dayagidi yana laka tunugi-mo'ena, keke adafaiweya kanamidiluvani.

**Lobama ana tovenuwa'ata seveni vita koyo-
mo'ena babiya hihegehobuyena.**

15 ¹Dayaga lakahina ga'itana gihavaina, kadu gavadi aimo ginalakayemu ana iya'iyaya ga'eno'itayena. Mena iya'iyayainadi ma lakahina kadu yauyaulowogina. Tovenuwa'ata seveni ga'itadi ada nimadiya vita koyo-mo'edi seveni hidadauda, vitai-dina agaidiya tomiyababi matahiwadi hinanuhagana. Ada mena vitai-dina babiya hinahegehobuyeni-yo kaliva hinakivekoyodi be medema againe Yaubada yana ila'a ginahavaina, ginahavai-mo'ena. ²Kadu ga'ita tu tamo gavadi ana ita vaita lehaga atumanamanahina amine tu hinagene giyabela vaita ai'ala'alata amine ga'itana. Mena lehaga liline kaliva moya'aidi ga'itadi, badi hifaiwalahegahega-mo'a be kevakeva manimaninina ana ikilukiluma buye kadu ana egana ana naba hidibutoyogedi. Kweli ana aba'iveyamumu vaita kita haghagina amine Yaubada giveledi-ma hi'abina. ³ ⁴Moya'aidi hikwelikweli, yadi kweli ma Mosese Yaubada yana tofaisewa againe kadu Yaubada yana Sifi kabi'ona againe give'inuba. Kweli hidede amine.

Yaubada Kaiwabu O Tofaiwala-mo'a
Ya gugai lakahidi, keke kanawona.
O yo'o tulina tulina adi Tokaiwabu,
Ya dewa tunutunugina kadu velemona.

⁴ Ho Kaiwabu kaliva moya'aidi O hinamatause
kadu a egana hinakivekaiwabuna.
O akai'ibe'u-mo'a mahamahali,
Yo'o moya'aidi againiya hina'ela
yadi wave'amohimohina hina'ibo'ula,
fa'ina ya laufata tunutunugina
u'ivemogatalina be ka'itana.

Au hidede amine hikwelikweli.

⁵Yadi kweli ganogalina tu kadu ga'ita, Yaubada yana manuwa-
tafalolo lobameya hiyauna ada hinagene Yaubada yana abamiya
hivewagana Vetawana Tabu-mo'a ma ga'itana. ⁶Au lobama ana
tovenuwa'ata seveni vita koyo-mo'ena seveni hi'abina-ma manuwa-
tafalolo againe hihobu. Kaleko kwayakwayana ve'akinamanamalina
againe hivaigau ada niniwala gola manawadiya hihifona. ⁷Au gaitoma
wayawaidi fifiwaladiyao adivefowa ana kaliva sa'eyana nau'a gola
seveni givaidi be tovenuwa'ata seveni giveledi. Mena nau'a Yaubada
Tomiya-vagata yana ila'a againe himaga. ⁸Giveledi tu Yaubada yana
mahalina ve'akinamanamalina kadu yana faiwala siyo amine manuwa-
tafalolo ana vetawana gibabalina be keke tamo hakwadi anafaiweya

† 15:1 Ha 15:6-7 † 15:3 2Veh 32:3-4; Ha 16:7 † 15:5 Hi 9:3

gidaluku tu nagona tovenuwa'ata seveni vita koyo-mo'ena seveni babiya hinahege-'owona.

Yaubada yana ila'a nau'a seveni givemagadi-ma kahihina.

16 ¹W Tu Yaubada yana mahalina ve'akinamanamalina yana manuwa gibabalini-yo ago'ago lakahina manuwa-tafalolo againe giyemu-ma ganogalina. Badi lobama ana tovenuwa'ata adiveseveni agaidiya gigahe gigayo, “Wanana be Yaubada yana ila'a wanau'adi seveni babiya wanabihiwana.” ²x Au bana tovenuwa'ata nagona gina yana nau'a babiya gibihiwana tu tomiyababi kevakeva manimaninina yana iya'iyaya hivaina kadu ana ikilukiluma hihawadavadavana-ma agaidiya koliya lakahina wamagana kadu wa'aulolona gi'afolefoledi.

³y Tu tovenuwa'ata anavelu yana nau'a lehageya gibihiwana tu givedayaga vaita to'alika dayagidi gufagufana amine, ada gaitoma moya'aidi wayawaidi lehageya himimiyami-ma hi'alika.

⁴Tu tovenuwa'ata anaveto yana nau'a gufa lakahidi kadu guya agaidiya gibihiwana tu hivedayaga. ⁵Gibihiwani-yo tovenuwa'ata kadu sa'eyana, bana gufa ana to'itave'avina yana gahe ganogalina gigayo,

O Yaubada, Kaliva mahamahali,
tuwaina umiyami kadu adamoya umimiyami.
O uvehimeya be tomiyababi mena matahiwadi
hinuhagana. Adi laufata uveledi-ma tunutunugina.

⁶z Ya yo'ogaga kalivai-dina kadu
O bona ana to'awatalatalaina himunudi
be dayagidi gimadu.

Ada au gufa givedayaga-ma againe uveyudi
Yadi koyona gilubodadi amine.

Au hidedemi gufa ana to'itave'avina gigahe. ⁷a Ada ago'ago sa'eyana Yaubada yana atudidigeya giyemu-ma ganogalina gigayo,

Ehe, Yaubada Kaiwabu O Tofaiwala-mo'a,
ya laufata velemo'ena kadu tunutunugina.

⁸Gigahe-yo tovenuwa'ata anavefowa yana nau'a kauwana againe gibihiwana tu Yaubada kauwana gikivegivegina-mo'ena ada vaita ai'ala'alata amine tomiyababi gi'alahidi. ⁹b Kauwana gilukalalava vaita ai ma gi'alahidi, au hi'ago'uga be Yaubada ana egana hihawatagona, Bana yana abavehimeya againe vitai-dina hidadauda-ma Kalivai-nadi. Atu nuwavilana hidibutoyogena be keke Yaubada hidakivekaiwabuni.

¹⁰c Tu tovenuwa'ata anavefaifi yana nau'a kevakeva manimaninina yana didiga'ulu againe gibihiwana tu yana abavehimeya matatabuna

w 16:1 Ha 16:17; Sef 3:8 x 16:2 Yem 9:10; Ha 13:11-17 y 16:3 Yem 7:17-21

z 16:6 Ha 17:6, 18:24 a 16:7 Ha 19:2 b 16:9 Ha 9:20-21 c 16:10 Yem 10:22

gi'uyuyuna. ¹¹Yana kaliva hi'aulolove'ine fa'ina meyadi hiyovayovana ada yadi aulolo kadu adi koliya lakahina fa'ina Yaubada lobameya hihawatagona. Atu nuwawilana hidibutoyogena be keke yadi dewa koyona hidavenikohiyeni.

¹²Tu tovenuwa'ata anavesikisi yana nau'a gufa lakahina ana egana Yufalete againe gibihwana tu gufa gi'ahalina be tokikaiwabu yadi tolugaviya buye lauhanaga amine hina'ela-ma yadi eda gikidewedewena. ¹³Au balauma koyodiyao adi'itoto adi ita vaita kalikali amine ma ga'itadi. Bana kaliva vaita wayo'o amine kadu bana kevakeva manimaninina kadu bana falofita ve'alololona, (higa mena kevakeva manimaninina ana nimavelu), awadiya kalikali-dina hiyemu. ¹⁴^dMena balauma Setani yana yo'o kalivai-dina ada fafali moya'aina adi tokikaiwabu matadiya aituha fifiwaladi hififaisewadi. Hidedemi hinuwa'abiyedi be lugaviya fa'ine hivaga'auhidi ada mena tokikaiwabu moya'aidi Yaubada Tofaiwala-mo'a yana tova lakahina againe hinalugaviya.

¹⁵^eTu Iya Yesu ganagahe. "Tokai'afu gi'elakau amine Iya gana'ela ganaveyaulowogimi. Hai kaliva Iya fa'ikuya ginavanevanenega kadu ana vaigau keke ginavehalilini tu yana dewa gina'itave'avina, medema aimo yana vemwamwala gavatubuga! Au keke vaita konekonena amine kaliva matadiya yana wawowomumu ginamiyami."

¹⁶Hidedemi Yesu yana gahe giyemu tu balaumai-dina koyodiyao kadu ganalukahihiyedi. Au balauma badi tokikaiwabu lauhanaga amine hina'ela-ma higahedi be fafali bona Hibeliu againe hivewagana Amagedoni againe hivaga'auta.

¹⁷^fTu tovenuwa'ata anaveseveni yana nau'a hivega lobama hinafane gi'etohiwana. Auhe'ama ago'ago lakahina Yaubada yana didiga'u'uuya gikova. Mena didiga'u'u manuwa-tafalolo hinagene gidadauda. Ada gikova'awafatafata gigayo, "Ahe'i! Yaubada yana ila'a wanau'adi matatabudi ahe hibihiwadi." ¹⁸^gAuhe'ama nama gisisinamana, butuna gilaulauga, atala gihegehegena kadu babi gili'uli'u lakahi-mo'ena. Tuwai-mo'ena Yaubada kaliva gimidibubuna ana toveya be ginauwena tova adamoya babi keke tamo tova hidede amine gidali'uli'u toyogina. ¹⁹^hAu melala lakahina gili'uyavalina ana tufo tohiye au gihavaina. Kadu fafali tulina tulina ana melala matatabudi gili'uyaweyawelina. MiBabiloni higa melala lakahina kalivai-dina yadi koyona moya'aina Yaubada ginuwa-nunauyena be yana vehimeya againe yana ila'a lakahi-mo'ena ana gowa hiyuyena. ²⁰Himula matatabudi hiyawowola kadu oya moya'aidi gili'uvekavivilidi. ²¹ⁱWehi kugakugana vaita aisi amine, kugai-nadi abokakaina ana vita vaita bawe halahalana amine (higa

^d 16:14 1Ti 4:1; Ha 19:19 ^e 16:15 1Te 5:2; Ha 3:3; Lu 12:37-40 ^f 16:17 Ha 16:1
^g 16:18 Ha 8:5 ^h 16:19 Ha 14:8-10 ⁱ 16:21 Ha 16:9,11

50 kilo) lobameya gi'alilihiwana be kaliva gifihafihadi. Ada mena vita koyo-mo'ena fa'ina, kaliva Yaubada hihawahawatagona, fa'ina vitai-nadi koyona, koyo-mo'ena.

**Kwamayoku yamayamadadadi kevekeva
manimaninina againe hiyage-ma kahihidi.**

17 ¹Tu mena vita anaveseveni ana tova gihavaina, bana tovenuwa'ata adiveseveni wanau'adi seveni adi yo'o kalivana agaikuya gi'ela gigaheku gigayo, “U'ela be kana melala kikaiwabuna gufa moya'aidi lilidiya hive'alahina-ma ana matahiwadi ganavehawale. Melalai-nadi vaita kwamayoku lakahidi yamayamadadadi amine.

²Fafali tulina tulina ana tokikaiwabu Yaubada hivekwaulaugena fa'ina yadi huluva vaita badi buye hida'udo'udo kadu yadi nuwanuwa koyodi tomiyababi moya'aidi nuwadi givaina, higa vaita yadi udo ana oine hiyuyena be hivekwavakwava.” Hidedemi tovenuwa'ata gigaheku.

³^kTu Yaubada Alu'aluwana giluvaiyeku-yo tovenuwa'ata babigaga againe ginauweku. Medede againe kwamayoku sa'eyadi kevekeva manimaninina yabeyabelina kwaune hivetogadi-ma ga'itana. Kevekevai-nadi u'una seveni kadu ana siko teni kadu wowona matatabuna againe egana koyodi hidadauda, eganai-dina Yaubada hihawatagona.

⁴Kwamayoku kaleko likelikenana kadu yabeyabelina againe hivaigau vaita wakwamayokudi, kadu vaigau tulina tulina hivigauyena, gola, kabala ve'akinamanamalidi, bidi fatana lakahina. Gowa gola againe hibubuna-ma hi'abina, gowai-nadi dewa moya'aidi koyodi Yaubada givenikohiyedi-ma agaidiya gimaga, kadu yadi udo tulina tulina ana bwanene againe gimaga. ⁵Badi deba'aidiya kwamayoku adi egana hi'etoladina ada adi egana ana halamana vitana vaita gahesevauya amine. Adi egana hidede amine.

Hida hima Babiloni melala lakahina.

Badi'e ma yamayamadadadiyao hinadi

kadu babi ana dewa koyodi moya'aidi

badi hivenatunedi.

⁶Badi kwamayoku ga'itadi-ma adi ita vaita gufa laulaugina hidayu-fa'ila yo hidavekwavakwava. Gufai-nadi ma Yaubada yana yo'ogaga kalivai-dina dayagidi, badi Yesu againe hiluve'avina fa'ina dayagidi gimadu-ma kalivai-dina. Kwamayoku ga'itadi againe gayaulowoga-mo'a. ⁷Bana tovenuwa'ata gitoliyeku gigayo, “Gavadi-yo hidede amine uyaulowoga? Hida kevekeva manimaninina u'una seveni ana siko teni kadu kwamayoku kwaune hivetogadi-ma fa'idiya ganakivetuvetunu. Badi adi halamana sevasevauyana tu againiya ganalukahihiyena. ⁸^mHida

kevakeva manimaninina u'itana-ma tuwaina gimiyami, adamoya keke wayawaina gidamiyami tu aimo tova mulina Kahu Tunugi-vadavada'aina balauma yadi abageya ginalakayemu be ana agolaufofola ginanuhagana. Tuwai-lokalokana Yaubada aimo babi keke gidabubuni ana toveya, kaliva tufoidi yawai-vagahidi ginaveledi-ma adi egana yana buki againe gi'etoladina. Tu badi tomiyababi adi egana keke gida'etoladini-ma kevakevai-nadi manimaninina hina'itana againe hinayaulowoga, fa'ina tuwaina gimiyami, adamoya keke wayawaina gidamiyami tu tova mulina ginayemuna-havagi.

Kivetuvetunu kahihi-nadi ana nuwanuwa fa'ina.

⁹Tobohiyaku, giluboda be ya wanuwahuya mena gaitomai-nadi unanuwenuwena. Ana nuwanuwa hidede amine. U'una seveni au oya seveni kwamayoku hivetogadi-ma oyai-dina higa oya seveni kabune melala hive'alahina. ¹⁰Kadu mena u'una seveni ana nuwanuwa sa'eyana ma tokikaiwabu seveni. Tokikaiwabu adivefaifi yadi abavehimeya gihavaina, tova adamoya bana anavesikisi givehivimeya tu bana anaveseveni aimo keke gidalakayemu. Tu ginalakayemu againe tova kabisonaga yana abavehimeya ginamiyami tu ginahavaina. ¹¹Bana kevakeva manimaninina tuwaina gimiyami tu adamoya keke wayawaina gidamiyami-ma au tokikaiwabu adiveseveni adi yo'o kalivana. Tu aimo ginayemuna-havagi be bana tauna ginavehivimeya tokikaiwabu anave'eita. Bana'e ma yana abavehimeya ginahavaini-yo au ginana ana agolaufofola ginanuhagana.

¹²Tu ana siko teni u'itana-ma au tokikaiwabu teni tu aimo keke hidavebutu hidavehivimeya. Atu aimo abavehimeya hinavaina be bai sa'eyanaga againe tokikaiwabu amine bana kevakeva manimaninina buye hinavehimeya. ¹³Badi tokikaiwabu teni yadi nuwanuwa sa'eyana ada yadi faiwala kadu yadi abavehimeya kevakeva manimaninina againe hinasedamanena. ¹⁴"Yaubada yana Sifi kabi'ona againe hinalugaviya tu Sifi kabi'ona yana yo'o buye hinafaiwalahege-mo'edi, fa'ina Bana'e tovehimeya yadi Tovehimeya, tokikaiwabu adi Tokaiwabu. Boi tuwaina mena yana yo'o kalivai-dina gikovadi be giluwafadi ada badi yadi wa'atuvefa'ila himulimuliyena." Au hidedemi tovenuwa'ata gikivetuvetunuku.

¹⁵Kadu'e tovenuwa'ata gigaheku gigayo, "Gufa moya'aina agaidiya kwamayoku yamayamadadadi hivetogadi be u'itadi-ma ana nuwanuwa hidede amine. Gufa ma yo'o tulina tulina, adi loi tulina tulina, meyadi tulina tulina, yadi fafali tulina tulina. ¹⁶°Kevakeva manimaninina kadu ana siko teni u'itadi-ma kwamayoku yamayamadadadi hinavenikohiyedi.

ⁿ 17:14 Ha 19:11-16,19-20 ° 17:16 Ha 18:8

Yadi lokoloko moya'aina hinalemadi be konekonedidi hinanuyabuyabudi. Muliya vidodi hina'ana tu luludi aiya hinakabudi. ¹⁷Au hidede amine kwamayoku hinakivekoyodi fa'ina Yaubada yana nuwanuwa ase'asediya ahe gisena be yadi nuwanuwa sa'eyana yadi abavehimeya kevakeva manimaninina againe hisedamanena. Ada kwamayoku hinakivekoyodi-yo Yaubada yana gahе ginalakayemu velemo'ena. ¹⁸Badi kwamayoku u'itadi-ma au melala lakahina babi ana tokikaiwabu matatabudi givehivehimeyedi." Au hidedemi tovenuwa'ata gigaheku.

Yaubada miBabiloni ginaluyaweyawelidi.

18 ¹Tu kwamayoku adi nuwanuwa vaita melala lakahina amine ga'itadi-yo kadu lobama ana tovenuwa'ata velugana lobama amine gihobuhobu'ela-ma ga'itana. Bana'e ma yana wa'abavehimeya lakahina ada yana mahalina ve'akinamanamalina babi matatabuna gituvemahalina. ²Au aimo gavadi ginalakayemu-ma fa'ina gikova'awafatafata gigayo,

Babiloni hida hima melala lakahina
hiluyawelina, hiluyaweli-'owona.

Medede againe Setani yana yo'o hive'abaga,
balauma koyodi moya'aidi hivevadalauga
kadu manuga koyodiyao itamatamatauhidi
melalai-nadi ana autu'u hivaina.

³Babi ana tokikaiwabu tulina tulina
yadi yo'o kalivai-dina buye'i
melalai-nadi ana nuwanuwa ita'italuvadigana
nuwadi gi'abina, gi'abi-mo'ena.

Wa'ita, kwamayoku kaliva higayena be
gufa laulaugina hiveyuni-yo givekwavakwava
tu buye hi'udo'udo amine,
meda kaliva moya'aidi melalai-nadi againe
udo tulina tulina agaidiya hihawahegedi.

MiBabiloni nuwanuwadi lakahina babi ana lokoloko
fa'ina fafali tulina tulina ana tonilokoloko
hilukuluku'ela be kimone moya'aina againe
mani keke kabi'ona hivivaini-yo hikikaiwabu-mo'a.

Au hidedemi tovenuwa'ata kikaiwabuna gigahe.

^{4P}Gigahe-yo ago'ago velugana lobameya gikova-ma ganogalina gigayo,
Omi yaku yo'o melalai-nadi wanahegena,
yadi dewa koyona keke badi buye wanahuluvini,
Vita koyo-mo'edi ganaveledi-ma

keke nuwanuwaku omi wananuhagadi.

⁵ Wa'ita, yadi koyona hi'ive'ave'ahina
vaita gidalaka lobameya, ada
Yaubada yadi dewa baladi ginuwa-nunauyena.

Au hidedemi gahe ganogalina. ⁶ Kadu tovematahiwadi agaidiya gigawe gigayo,
MiBabiloni yaku yo'o hikivekoyodi amine
meda badi kalivai-dina omi wanakivekoyodi.

Yadi koyona sa'eyana sa'eyana
matahiwadi luhei luhei wanalaufata.
Vita lakahina ana gowa hikidewedewena

be yaku yo'o hiveyudi amine,
meda gowai-nadi luhei wanakidewedewedi
be badi hinayuyedi adi matahiwadi.

⁷ Yadi kikaiwabu lakahina fa'ina hiselakalaka,
au yadi selakalaka analaga amine
aulolo tagiya lakahina wanaveledi.

Gilubodadi be aulolo-dina hinanuhagadi
fa'ina tova moya'aina taudiyao hikikilakahidi
higayo, Ime tokikaiwabu, vita keke ana'ayauneni.
Ime keke sikwasikwadiyao amine anagitagiya.

⁸ 'Hidedemi higahe fa'ina, aiyeta sa'eyanaga againe
adi vita lakahi-mo'ena agaidiya ginalakayemu,
alika tagiya loka.

Au ai'ala'alata gina'ala-'owodi,
fa'ina Yaubada Kaiwabu adi Tovematahiwadi
amanadi Kaliva Fifiwalana.

Au hidedemi kadu gahe ganogalina.

Tonilokoloko Babiloni ana ivebwavi fa'ina hinalulaukuhi.

⁹ Tu babi ana tokikaiwabu melalai-nadi ana dewa udo'udona kadu ana
kikaiwabu hi'itavaina be buye hikoyo-ma melala gina'ala'alata-ma siyona
hina'itana againe hinatagitagi hinalulaukuhi. ¹⁰ MiBabiloni yadi aulolo
yadi vediwe fa'ina tokikaiwabu-dina hinamatautave'ine be hinamidilauva
hinakova hinagayo,

Hoiyoi! Hoiyoi! Ho melala lakahina!

Ho Babiloni melala fifiwalana!

Bai sa'eyanaga againe adi matahiwadi hinuhagana.

Au hidedemi babi ana tokikaiwabu hinagahe.

¹¹ Tu babi ana tonilokoloko melala ana ivebwavi fa'ina hinatagitagi
hinalulaukuhi hinagayo, "Melala a gibwavi. Keke tamo hakwadi

gidamiyami-yo yada lokoloko gidakimoneni fa'ina kanavekoyokoyo. ¹²Yada lokoloko ma gola siliva kabala yamuyamumu-'owogidi kadu bidi fatana lakahina, kaleko tulina tulina kwayakwayana likeliken a yabeyabelina wowobikabikana, higa wakalivadiyao adi vaigau. Kadu ai wamagana tulina tulina kadu ikilukiluma tulina tulina vaita manuwa ana vaigau fa'ina, gaitomai-dina tufona kevakeva halana againe hibubuna, kadu tufona ai fatana lakahina, tufona kofa, tufona kainumula, tufona kabala kwayakwayana hawahawaviyanina againe hibubudi. ¹³Kadu yada lokoloko velugana ma gaitoma tulina tulina wamagana vaigau fa'ina, kadu vanedimodimo ana egana inisenisi mulo falanikisenisi, kadu oine, kadu bunama guwana ana egana olive againe hibubuna amanadi, kadu falawa be witi, kadu bulumakau be sifi, kadu hosi be waka abalulautaina. Kadu kaliva vevine vaita lokoloko amine akimokimonevedamanedi be kaliva adi agetoga fa'ina.” Au hidedemi tonilokoloko yadi lokoloko fa'ina hinagahe.

¹⁴Kadu vaita miBabiloni-mo'edi agaidiya hinagahe hinagayo, “Lokoloko tulina tulina nuwanuwami lakahina ma hiyawowola. Yami kikaiwabu yami giba ve'akinamanamalina gihavaina, gihavai-mo'ena. Au aimo keke wanavai-havagiledi.” ¹⁵⁻¹⁶Badi tonilokoloko lokoloko-dina melalai-nadi againe hikimokimonevedamanedi-yo hivewakalivadiyao amanadi hinamidilauva miBabiloni yadi vediwe fa'ina hinamatautave'ine. Hinatagitagi hinalulaukuhi hinagayo,

Hoiyoi! Hoiyoi! Ho melala lakahina!
 Boi ami vaigau hagihagi-mo'ena,
 kaleko kwayakwayana likeliken a yabeyabelina,
 kadu gola, kabala yamuyamumu-'owogidi,
 bidi fatana lakahina wavivigauyedi.
 Hidedemi ami ita ve'akinamanamalina
 tu mena yami kikaiwabu gavatubuga ma
 bai sa'eyanaga againe giyawowola.

Au hidedemi tonilokoloko hitagilulauhawa.

¹⁷⁻¹⁸Tu waka ana tovmadu kadu toyage, badi waka ana tofaisewa kadu badi fatadi fa'ina hivetobayauma-ma hinamidilauva melalai-nadi gina'ala'alata-ma siyona hina'itana againe hinakova hinagayo, “Hida hima melala ma keke tamo melala amine, keke-mo'a.” ¹⁹Au hitagitagi hilulaukuhi lokoloko hiluyauyaula hikovakova higayo,

Hoiyoi! Hoiyoi! Ho melala lakahina!
 Toniwaka moya'aidi melalai-nadi againe
 yadi lokoloko hi'ali'aliyeni-yo hivewakalivana.

Au bai sa'eyanaga againe adi lauyawela hinuhagana.
 Au hidedemi waka ana kaliva hitagilulauhawa.

Babiloni ana matahiwadi gavatubuga!

20 ^tTu tamo hakwadi gigahe gigayo,
 Mena melala ana matahiwadi givaina fa'ina
 omi tomiyalobama wanavemwamwala.
 Kadu omi Yaubada yana yo'ogaga
 kadu omi afositolo be falofita
 moya'aimi wanavemwamwala.
 Wa'ita, miBabiloni omi hikivekoyomi
 fa'ina Yaubada badi agaidiya gilaufata.

21 Tu lobama ana tovenuwa'ata fifiwalana kuga abokakaina vaita
 kugawauwaula amine gifewana be lehageya gihegehobuyena gigahe
 gigayo,

Kuga yaku wafaiwala lehageya gahegehobuyena
 be aimo keke wana'itani amine,
 meda melala lakahina Babiloni
 yadi wafaiwala hinaluyawelina be aimo keke wana'itani.

22 Hida melala ana abavemwamwala ginahavaina.
 Au keke tamo vemwamwala ana ago'ago kananogalini,
 modawa kulele hiulega agodi ginahavaina,
 kadu keke kananogali-havagileni.
 Tofaisewa yadi faisewa tulina tulina
 keke hina'abi-havagileni.
 Nila ana a'oli'oli butuna
 aimo keke kananogali-havagileni.

23 Lamufa mahalina melalai-nadi againe
 aimo keke kana'ita-havagileni.
 Badi nagivagu yadi wavemwamwala agodi
 kadu keke kananogali-havagileni.
 Hida melala ana tonilokoloko ma boi
 vaita babi ana kaliva kikaiwabudiyao amine.
 Yo'o tulina tulina kalivai-dina
 yana alavedivedigaga againe ginuwa'abiyedi.

24 Kadu hida melala kalivai-dina
 Yaubada bonana ana to'awatalatalaina
 be yana kaliva mahamahalidiyao
 hiluve'alikadi be dayagidi gimadu.
 E, gaveyao moya'aidi fafali tulina tulina agaidiya
 Yesu Keliso fa'ine alika hinuhagana,
 medema vaita dayagidi Babiloni againe gidamadu.

Au hidedemi tovenuwa'ata fifiwalana gigahe.

Yoni kweli lakahina lobameya ginogalina.

19 ¹Tu Babiloni ana lauyawela ga'ita-yo butuna lakahina ganogalina, vaita yo'oyo'o lakahi-mo'edi lobameya hikovakova higayo, Aleluya! Ada kibababala Yaubada againe give'inuba, Bana'e kikaiwabuna kadu fifiwalana.

²Yana laufata velemo'ena kadu tunutunugina. Mena melala vaita kwamayoku yamayamadadadi amine yadi dewa udo'udona agaidiya gilaufata. Dewai-nadi againe tomiyababi hinuwa'abiyedi. Tu yana tofaisewa hiluve'alikadi-ma dayagidi gilaufata.

Au hidedemi hikova. ³Kadu hikova-havagilena higayo, Aleluya! Yaubada kanadavadavana fa'ina melalai-nadi siyona gilakalaka-vagata.

⁴Au tomiyalobama adi tonagona tuweniti-fowa kadu gaitoma wayawaidi fifiwaladiyao adivefowa Yaubada againe hi'ibo'ula-mo'a be hihawadavadavana, Bana'e yana didiga'u'uya givetogana amanadi. Kadu badi hikovakova higayo,

Aleluya! Yama nuwanuwa ehe hidedemi.

⁵Tu ago'ago sa'eyana Yaubada yana didiga'u'uya giyemu gigayo, Omi Yaubada yana tofaisewa kadu omi Bana'e wamatausena lakahimiyao kadu kabi'omiyao yada Yaubada wanadavadavana.

⁶Hidedemi gigahe-yo butuna lakahina vaita yo'oyo'o lakahi-mo'edi agodi amine ma ganogalina. Butudi vaita gufa lakahina gihobuhobu kadu atala gihegehegena toyogina ma amine. Badi hikovakova higayo,

Aleluya! Yada Yaubada Kaiwabu givebutu givehivehimeya, Bana'e Tofaiwala-mo'a.

⁷Kanavemwamwala kanagakahikahi, au Bana'e kanakivekaiwabuna. Fa'ina yana Sifi kabi'ona yana nagi ana tova a gilakayemu, ada yana kwamayoku ma higa Yesu ana tovetumagana moya'aidi nagi fa'ina ahe gikidewadewa.

⁸E, Yaubada kaleko kwayakwayana givelena, yegayegana kadu ve'akinamanamalina.

^u 19:2 Ha 6:10 ^v 19:3 Ha 14:11 ^w 19:4 Ha 4:9-11 ^x 19:6 Ha 11:15-18, 14:2-3
^y 19:7 Ha 21:2,9; Ef 5:32 ^z 19:8 Ais 61:10

Au hidedemi yo'oyo'o hikovakova.

[Mena kaleko kwayakwayana ana nuwanuwa ma Yaubada yana kaliva mahamahalidiyao yadi dewa yegayegana.]

⁹“Tu bana tovenuwa'ata gigaheku gigayo, “Hidedemi u'etoladini. Gaveyao Yaubada yana Sifi kabi'ona yana nagi ana avemwamwala againe giyowanidi, medema yadi vemwamwala gavatubuga!” Au hidedemi gigahe. Kadu gigayo, “Mena gahe-nadi au Yaubada yana gahe velemo'ena.”

¹⁰^bHidede amine gigahe-yo tovenuwa'ata agene ga'ibo'ula-mo'a higa gadahawadavadavana. Atu gihawataku gigayo, “Auwe, keke unahawadavadavaku. Iya'eku Yesu yana tofaisewa anafaiweya kadu o'eni kadu tobohiyamomo, omi nuwanuwa velemo'ena Yesu gi'awatalatalainena be againe waluluve'avina-ma kalivai-mina. Keke iya unahawadavadavaku, au Bana Yaubada. Unogali! Yaubada yana nuwanuwa velemo'ena Yesu gi'awatalatalainena-ma meda Yaubada bonana ana to'awatalatalaina tuwaina Yesu nunune hinauna kadu adamoya nunune hinanauna.”

Kaliva ana egana Bona hosi kwayakwayana againe giyage-ma kahihina.

¹¹Tu tovenuwa'ata gilukahihi gihavaina, lobama ana wanafali yauyaugina ga'itana, ada mene matakuya hosi kwayakwayana gimidi tu Bana Kaliva kwaune gihiyoto-ma ana egana Todibumuhiga kadu Togahe velemona. Yana abavehimeya tunutunugina againe gilulugaviya kadu kaliva agaidiya gilulaufata. ¹²^cMatana give'akinamanamalena vaita ai'ala'alata amine kadu u'lune badau kikaiwabuna moya'aina hidadauda. Kadu Bana wowone egana kilukilumina gidadauda, eganai-nadi keke tamo hakwadi gidahalamaneni tu Bana anakaibe gihalamanena. ¹³^dKaleko againe givaigau-ma dayaga lakahina gifotana, ada Bana ana egana Bona higa Yaubada bonana amanadi. ¹⁴Bana Bona wai ginagona tu badi lobama ana tolugaviya adi yo'o adi yo'o wai himulina. Hosi kwayakwayadiyao agaidiya hiyage ada kaleko kwayakwayana yegayegana kadu ve'akinamanamalina againe hivaigau. ¹⁵^eBana Bona awane fetu sinasinahina giyemu be medema againe yo'o tulina tulina ginalaulaudi-yo agevavane ginasedi. E, yana fuluma kainumula againe ginavehimeyedi. Kaliva kelefai abavagafuwafuwa againe hivagafuwafuwana amine, meda Yaubada yana ila'a ana abanauhaga againe Bana Bona Tauna tokoyona ginavagafuwafuwadi be Yaubada yana ila'a lakahi-mo'ena hinanuhagana. ¹⁶^fAda ana aikeva kadu ubuna againe egana kilukilumina gidadauda. Egana hidede amine.

^a 19:9 Lu 14:15 ^b 19:10 Ha 22:8-9 ^c 19:12 Ha 1:14 ^d 19:13 Yo 1:1,14 ^e 19:15 Ha 1:16
^f 19:16 Ha 17:14

TOKIKAIWABU ADI TOKAIWABU
TOVEHIMEYA ADI TOVEHIMEYA

Yaubada nibaineyao adi agolaufofola hinuhagana.

¹⁷Kadu'e ga'eno'ita tu lobama ana tovenuwa'ata kauwana againe gimidimidi-ma ga'itana. Bana manuga moya'aidi lobama hinafane hiyaveyavega-ma agaidiya gikova'awafatafata gigayo, “Moya'aimi wa'ela be Yaubada yana abutu fa'ina wanavaga'auta. ¹⁸Abutu-nadi againe kaliva moya'aidi gaviya againe hina'alika-ma vidodi wana'au'ana, tokikaiwabu tolugaviya adi togiyomatana kikaiwabudiyao buye'i, kadu hosi adi kaliva buye'i, e kaliva moya'aidi lakahidiyao kadu kabi'odiyao, agetoga adi tovehimeya buye'i vidodi wana'au'ana.” Au hidedemi tovenuwa'ata gikova.

¹⁹^gTu bana kevakeva manimaninina kadu babi ana tokikaiwabu moya'aidi adi tolugaviya adi yo'oyo'o buye'i gaviya fa'ina hivaga'auta-ma ga'itadi. Hivaga'auta higa Bana hosi kwayakwayana kwaune gihiyoto-ma kadu yana tolugaviya hidalugaviyadi. ²⁰^hAtu Bana Bona yana yo'o buye'i nibaidiyao hifaiwalahegehege-mo'edi, ada bana kevakeva manimaninina kadu falofita ve'alololona hikive'avidu. Mena falofita boi kevakeva manimaninina loseyanina amine iya'iyaya yauyaulowogidi gififaisewadi be medema againe kaliva kevakeva manimaninina ana iya'iyaya hivaina, kadu ana ikilukiluma hihawadavadavana-ma ginuwa'abiyedi. Au adi'iselu hikive'avidu-yo wayawaidi muna gaitoma yagoyagona alamatafifailina giyabeyabela-ma againe hihegehobuyedi. ²¹ⁱTu adi tolugaviya moya'aidi Kaliva yana fetu awane giyemu-ma againe yadi alika hinuhagana. Kalivai-nadi hosi kwayakwayana kwaune gihiyoto. Tu au hi'alika-'owoga ada manuga moya'aidi hi'ela vidodi hi'au'a hi'au'a tu hi'a-wayoga.

Yaubada Setani giyogona be malamala wani tausani ginamiyami.

20 ¹^jTu gaviya gihavaina againe lobama ana tovenuwa'ata sa'eyana lobama amine gihobuhobu'ela-ma ga'itana. Kahu Tunugi-vadavada'aina ana kihi bana nimane gidadauda kadu bulava kainumula lakahina gl'abina. ²⁻³^kAu bana wayo'o abokakaina gikive'avina digo giyogona tu Kahuya gihegehobuyena au Kahu gifalidonena be medede againe malamala wani tausani (1,000) agaidiya balauma buye hinamiyami. Bana wayo'o ma hida hima oloto tuwai-lokalokana gimiyami-ma ana egana Diyabolo yo Setani. Au gifalidonena tu keke tamo hakwadi anafaiweya ginayauni be higa keke anafaiweya tomiyababi kadu ginanuwa'abiyedi. Malamala wani tausani ginahavaidi-yo Yaubada

^g 19:19 Sam 2:2 ^h 19:20 Ha 13:11-17, 20:10 ⁱ 19:21 Ha 19:17-18 ^j 20:1 Ha 9:1
^k 20:2-3 Ha 12:9; Yu 1:6

ginahawahegena be ginalakayemu ada tova kabisonaga yaunyaugina ginamiyami.

⁴Kadu'e ga'eno'ita tu didiga'u'u moya'aina ga'itadi, ada badi Yaubada abavehimeya givededi be hinavedewayauga-ma didiga'u'u agaidiya hivetogadi. Kadu kaliva aluwadi ga'itadi, Yesu fa'ine hi'awatalatalaina kadu Yaubada bonana againe himiyave'avina fa'ina boi hiluve'alikadi amanadi. Bana kevakeva manimaninina kadu ana ikilukiluma keke hidahawadavadadi, ada yana iya'iyaya deba'aidiya o i'atagidiya keke hidavaini. Hi'alika tu Yaubada gihawahegedi be yawaidi hinuhagana ada malamala wani tausani (1,000) agaidiya Keliso buye hivehivehimeya. ⁵Hidevama mididi-havagi nagona atu to'alika velugadiyao ma malamala wani tausani ginahavaidi-yo hinamididi-havagi. ⁶Badi nagona hinamididi-havagi ma Yaubada yana kaliva mahamahalidiyao ada yadi wavemwamwala hinamiyami. Aimo alika anavelu kaliva koyodiyao ai'ala'alata againe hinanuhagana ana toveya, badi Yaubada yana kaliva ma kadu keke-mo'a aulolo hinanuhagani. Au Yaubada kadu Keliso ana hawadavadava ana tofaisewa hinamiyami, ada malamala wani tausani agaidiya Keliso buye hinavehivehimeya.

Yaubada Setani ana agolaufofola againe gihege-vagahina.

⁷Tu malamala wani tausani (1,000) ginahavaidi-yo Yaubada Setani ginahawahegena be ana aba'aiyogona higa Kahu Tunugi-vadavada'aina againe ginahobu. ⁸Ginahobu-yo ginana babi matatabuna ana fafali agaidiya yo'o tulina tulina ginanuwa'abiyedi be gaviya fa'ina ginavaga'auhidi. Yo'oi-dina adi loi luhei, sa'eyana adi egana Gogi kadu sa'eyana Megogi. Ada yo'oi-dina adi kilagalaga vaita taliya ana makama amine. ⁹Badi kalivai-dina hinatauya hinalulaudeli babi matatabuna hinave'iyogiyogina be Yaubada yana yo'o yana melala nuwanuwana lakahina amanadi hinabodafididi. Atu ai'ala'ala'ata lobama amine ginahobu'ela be gina'alahi-'owodi. ¹⁰Kadu bana Setani kaliva ginuwa'abiyedi-ma Yaubada yana vehimeya againe muna lakahina gaitoma yagoyagona alamatafifailina giyabeyabela-ma againe hinahegehobuyena, munai-nadi againe boi kevakeva manimaninina kadu falofita ve'alololona badi adi'iselu hihegehobuyedi. Uyadayada be bogi medede againe hinavedivediwe tova inaga inaga keke ana abalauyabu.

Yaubada to'alika ginavedewayaugidi.

¹¹Kadu'e ga'eno'ita tu didiga'u'u lakahina kwayakwayana ga'itana kadu ana Kaliva ga'itana. Bana'e didiga'u'uya givetogana amanadi ana

¹ 20:4 1Ko 6:2; Ha 6:9, 13:16-17; Dan 7:27 ^m 20:6 Ha 2:11; 1Fi 2:9

ⁿ 20:10 Ha 19:20, 21:8; Md 25:41

ita kikaiwabu-mo'ena kadu ve'akinamanamalina fa'ina babi be lobama vaita hida'ota au hiyawowola. ¹²°Kadu to'alika ga'itadi, lakahidiyao kadu kabi'odiyao didiga'u'u wamagigine himidimidi, ada au Yaubada yana vehimeya againe buki hikiyavalidi. Buki-dina agaidiya badi kaliva moya'aidi yadi dewa matatabuna valeyana hi'etoladina be medema againe Yaubada adi laufata ginafolakena. Kadu buki velugana hikiyavalina, buki-nadi againe badi yawai-vagahidi Yaubada givedi-ma adi egana hidadauda. ¹³°Au gaveyao lehageya hitowa'alika kadu gaveyao avaleya hi'alika, medema Yaubada yana vehimeya againe alika ana abageya hitauya be himididi-havagi. Au kaliva sa'eyana sa'eyana Tovedewayauga matane hi'ela himidi be yadi dewa yadi dewa amine adi laufata givedi. ¹⁴°To'alika givedewayaugidi gihavaina, alika kadu alika ana abaga muna lakahina giyabeyabela-vagata ma againe hihegehobuyedi be gihavaidi. Munai-nadi au alika anavelu. ¹⁵°Tu yawai-vagata ana buki againe kaliva adi egana hilele-hagihagiyena, ada gava kaliva ana egana Yaubada keke gida'etoladini, medema muna lakahina giyabeyabela-vagata ma againe hihegehobuyena.

Lobama ivaguna kadu babi ivaguna kahihidi.

21 ¹°Kadu'e ga'eno'ita tu lobama ivaguna kadu babi ivaguna ga'itadi, fa'ina lobama tuwaina be babi tuwaina hiyawowola kadu lehaga gihavaina. ²°Kadu Bana Yaubada yana melala mahamahalina ana egana Yelusalema ivaguna Yaubada againe gitauya be lobama amine gihobuhobu'ela-ma ga'itana. Ana ita hagihagi-mo'ena vaita kwamayoku yana nagi fa'ina gidavevigauni be gidana yana kaliva againe. ³°Ada ago'ago sa'eyana Yaubada yana didiga'u'uya giyemu-ma ganogalina gikova'awafatafata gigayo, “Wa'ita, adamoya Yaubada kaliva agaidiya give'abaga ada Bana badi buye hinamiyami. Badi yana yo'ogaga amine hinamiyami, ada Yaubada Tauna ginave'alunedi be Bana badi yadi Yaubada ginamiyami. ⁴°Matailudi sa'eyana sa'eyana ginaluhegegedi. Aimo keke tamo alika o ase'u'aulolo o tagiya o aulolo, fa'ina mena vitai-dina a gihavaidi kadu babi tuwaina ana gaitoma moya'aina a hiyawowola.” Au hidedemi gigahe.

⁵°Tu Bana didiga'u'uya givetogana-ma gigahe gigayo, “Wa'ita, adamoya gaitoma moya'aina gakikive'ivagudi.” Kadu iya agaikuya gigahe gigayo, “Mena gahe-nadi una'etoladina, fa'ina gahe-nadi au velemo'ena ada omi kaliva amifaiweya wanavetumaganena.”

° 20:12 Ha 20:5, 13:8; 2Ko 5:10; Af 17:31 P 20:13 Lo 2:6; Ha 22:12

¶ 20:14 1Ko 15:24-26,54-55 ° 20:15 Md 25:41 ° 21:1 2Fi 3:13 ° 21:2 Hi 11:16; Ha 3:12

u 21:4 Ha 7:17; 1Ko 15:24-26

⁶Kadu gigahe-havagileku gigayo, “Ahe'i! Yaku nuwanuwa matatabudi ahe galuyabudi. Iya inubane kadu tabone, Iya Abave'inuba kadu Abalauyabu. Gava kaliva agona gitaina, medema yawai-vagata ana guya againe ganaveyuna ada gufai-nadi keke wafatana. ⁷Hai kaliva Iya fa'ikuya yana atuvefa'ila againe gifaiwala-mo'a, ana du'u gawonadabedabena-ma ginanuhagana, ada Iya yana Yaubada amine ganamiyami tu bana kadu natuku amine ginamiyami. ⁸Atu gaveyao keke Iya fa'ikuya hida'atuvefa'ila higa yadi wamatauta fa'ina keke Iya fa'ikuya ve'umagigi againe hidahawahegedi, badi keke hidavetumaganeku, badi dewa koyodi Yaubada givenikohiyedi-ma agaidiya hihawahegedi, badi toluve'alika kadu to'udo, badi kwelikweli tulina tulina hi'abina, badi mali yaubada agaidiya hi'odu'odu kadu tove'alololo moya'aidi, medema kalivai-dina adi loi aulolo keke kabi'ona hinanuhagana. Badi yadi abaga ma muna lakahina ai'ala'alata kadu gaitoma yagoyagona alamatafifailina againe giyabeyabela amanadi againe hinavedivediwe. Mena vedivediwe ana egana alika anavelu.” Au hidedemi Yaubada gigahe.

Yoni Yelusalema ivaguna ana ita gilukahihiyena.

⁹Tu tovenuwa'ata adiveseveni yadi nau'a seveni vita koyo-mo'edi seveni agaidiya himaga be hibihiwadi-ma adi yo'o kalivana agaikuya gi'ela gigaheku gigayo, “U'ela be kana kwamayoku nagivagu ganavehawale, bana Yaubada yana Sifi kabi'ona vavinena amanadi.” ¹⁰Gigahe-yo Yaubada Alu'aluwana giluvaiyeku be oya tunugi-mo'ena kabune gilakaveku, ada melala mahamahalina Yelusalema Yaubada againe gitauya be lobama amine gihobuhobu'ela-ma givehawaleku. ¹¹Melalai-nadi Yaubada yana kaiwabu againe give'akinamanamalena, ada ana ita vaita kabala yamuyamumu-'owogina amine, e kabala vaita kelasi amine ve'akinamanamalina ana egana diyasifa. ¹²Melala mena kabala ve'akinamanamalina agaidiya hi'alana, alai-nadi tunugi-mo'ena kadu ana abaluku tuwelo ada abaluku sa'eyana sa'eyana agaidiya lobama ana tovenuwa'ata sa'eyana sa'eyana himidimidi adi yo'o tuwelo. Ada abaluku agaidiya mi'sileli adi yo'o tuwelo adi egana kilukilumina hidadauda. ¹³Lauhanaga amine abaluku tohiye, mwaigugu amine kadu abaluku tohiye, bolimana amine kadu abaluku tohiye, yavalata amine kadu abaluku tohiye. ¹⁴Ada melala ana ala ana avalalakata ma kabala lalafana beyabeyana tuwelo, ada medema agaidiya Yaubada yana Sifi kabi'ona yana afositolo tuwelo adi egana hidadauda.

¹⁵Tu bana lobama ana tovenuwa'ata iya buye alulukahihi-ma aiwala vaita aba'etowava amine gola againe hibubuna-ma gi'abina higa mena

† 21:6 Ha 1:8, 22:13,17; Ais 55:1; Yo 7:37 † 21:7 Lo 8:14-17 † 21:9 Ha 15:1, 21:2; Ef 5:27

aba'etowava againe melala-mo'ena kadu ana abaluku kadu ana ala gida'etowavana. ¹⁶Ada melala ana ita hidede amine higa yana bala yana laka au sa'eyana. Au tovenuwa'ata yana aba'etowava againe melala gi'etowavana, ada yana bala yana laka yana tunuga ana etowava au sa'eyana ma ginuhagana, badi miGilika yadi etowava amine 12,000 sitediya higa vaita 2,800 kilomita amine. ¹⁷Ada melala ana ala gi'etowavana, ada ime miYuda yama etowava amine tovenuwa'ata gi'etowavana-ma ala ana tunuga 144 kiubiti higa vaita 64 mita amine. ¹⁸Mena melala gola hagihagi-mo'ena againe hibubuna, golai-nadi vaita kelasi lu'anuanunuyana amine, ada ana ala kabala vaita kelasi amine ve'akinamanamalina ana egana diyasifa againe hibubuna. ¹⁹⁻²⁰Ada melala ana ala ana avalalakata kabala yamuyamumu-'owogina tulina tulina agaidiya hivevigauna, ada kabalai-dina adi egana hidede amine.

Avalalakata nagona ma diyasifa againe hivevigauna
ana ita ma vaita kelasi ve'akinamanamalina amine.

Anavelu ma safaiya, matamatagina vaita
lobama matamatagina amine.

Anaveto ma agate, matamatagina vaita isisi'u amine.

Anavefowa ma emelodi, matamatagi-mo'ena.

Anavefaifi ma onikisi, lugologolohina yabeyabelina
kadu kwayakwayana.

Anavesikisi ma kaneliyani, yabeyabelina.

Anaveseveni ma kilisolaiti, yagoyagona.

Anave'eita ma beleli, matamatagina vaita
lehaga matamatagina amine.

Anavenaeni ma tofasi, yagoyagona tu lu'anuanunuyana.

Anaveteni ma kilisofesi, matamatagina tu
ve'akinamanamalina.

Anave'ileveni ma diyasito, likelikena.

Anavetuwelo ma ametisi, likelikena tu lu'anuanunuyana.

Hida kabalai-dina tufona ve'akinamanamalina kadu tufona lu'anuanunuyana. ²¹Melala ana abaluku tuwelo ma bidi lakahidi tuwelo agaidiya hibubudi higa abaluku sa'eyana bidi sa'eyana againe hibubuna. Bidi-dina ve'akinamanamalidi fatadi lakahina adi egana feli. Melala ana eda gola hagihagi-mo'ena againe hibubuna ana ita vaita kelasi lu'anuanunuyana amine. Melala ana ita au hidede amine.

²²Tu keke tamo manuwa-tafalolo melalai-nadi againe gada'itani, fa'ina Yaubada Kaiwabu Tofaiwala-mo'a kadu yana Sifi kabi'ona kaliva buye hive'abaga-yo adifata hihawadavadava-mo'edi. ²³Melalai-nadi ana mahalina keke kauwana o vaikohi againe gidamahalini. Au

Yaubada yana mahalina ve'akinamanamalina melala gituvemahalina kadu yana Sifi kabi'ona vaita melala ana lamufa amine. ²⁴Kadu mena mahalina babi ana yo'o tulina tulina yadi mahalina ada medema againe hinamiyami. Ada babi ana tokikaiwabu melalai-nadi againe yadi kikaiwabu hina'ali'aliyena. ²⁵Medede againe keke tamo mala gidabogi fa'ina, keke tamo tova ana abaluku hinafalini. ²⁶Yo'o tulina tulina yadi wave'amohimohina yadi kikaiwabu melalai-nadi againe hina'ali'aliyena. ²⁷Tu keke tamo gavadi bwanebwanebwanenena melalai-nadi againe ginaluku, keke-mo'a. Kadu keke tamo to'udo o tove'alololo hinaluku, keke-mo'a. Au badi adi egana Sifi kabi'ona yana buki againe gi'etoladina be yawai-vagahidi giveledi-ma, badi'iyagoga hinaluku.

Yawai-vagata ana gufa fa'ina gilukahihi.

22 ¹⁻²“Tu lobama ana tovenuwa'ata yawai-vagata ana gufa givhawaleku, gufa fo'ana kwayakwayana ada Yaubada kadu yana Sifi kabi'ona yadi didiga'u'uya giyemu be melala ana eda lakahina hinafane ginanauna. Gufa fafaline fafaline yawai-vagata ana ai himidimidi, ada ai-dina malamala sa'eyana sa'eyana ana vaikohi hinagene hiyoyoyo be giboyaboyala ada malamala ana vaikohi tuwelo agaidiya hi'i'aikolu. Ada gaveyao guwanai-nadi againe hi'au'a-ma yawai-vagahidi hinunuhagana. Tu ai lukumidi agaidiya ma yo'o tulina tulina yadi yamumu hinunuhagana. ³Boi Yaubada babi tuwaina gi'alatabutabuyena tu adamoya hida yana melala againe keke tamo gavadi againe alatabutabu gidadauda. Au melala hinagene Yaubada kadu yana Sifi kabi'ona yadi didiga'u'uya hivetogadi, ada yana tofaisewa ana hawadavadava againe hinafaisewa. ⁴Bana ana egana deba'aidiya ginadauda ada tova moya'aina badi Bana magigina hina'ita'itana. ⁵Uyuyu gihavai-mo'ena. Au Yaubada Kaiwabu Tauna yadi mahalina fa'ina, keke nuwanuwadi lamufa ana mahalina o ka'li kauwana ana mahalina. Ada badi'iyao Yaubada buye hinavehivehimeya tova inaga inaga keke ana abalauyabu.

Yesu yana yewa'ela fa'ina.

⁶Tu tovenuwa'ata gigaheku gigayo, “Hida gahegahe ahe u'etoladina-ma au gahe velemo'ena ada omi kaliva amifaiweya wanavetumaganena. Tuwaina Yaubada Kaiwabu Alu'aluwana bonana ana to'awatalatalaina giluvaiyedi-yo yana venuwa'ata hi'awatalatalainena. Meda adamoya yana tovenuwa'ata gi'iveninisena be higa gavadi gavadi tova kabisona makewa'e hinalakayemu, medema Bana ana agetoga agaidiya ginahawavemogatalena.” Au hidedemi tovenuwa'ata gigaheku.

^z 21:27 1Ko 6:9-10; Ha 3:5, 13:8 ^a 22:1-2 Aba 2:9 ^b 22:3 Ha 7:15 ^c 22:4 Md 5:8; Ha 14:1 ^d 22:5 Ha 21:23,25

⁷*e*Tu Bana Yesu ma gigahe gigayo, “Wanogali! Iya ganamaduyewa'ela. Hida buki againe gavadi gavadi aimo hinalakayemu-ma fa'idiya gavenuwa'ata-vagahimi. Omi gaveyao bonaku wanavenogalena, medema yami vemwamwala gavatubuga!”

⁸⁻⁹*Tu* iya'eku Yoni ma gaitomai-dina ganogalidi kadu ga'itadi-ma kalivai-kuna. Ada ahe ganogalidi kadu ga'itadi-yo lobama ana tovenuwa'ata givhawaleku-ma agene ga'ibo'ula-mo'a higa gadahawadavadavana tu gihawataku gigayo, “Auwe, keke unahawadavadavaku. Iya'eku Yesu yana tofaisewa anafaiweya kadu o'eni kadu tobohiyamomo, higa Yaubada bonana ana to'awatalatalaina kadu gaveyao moya'aidi hida buki ana gahegahe hi'ita'itave'avina amanadi. Keke iya unahawadavadavaku, au Bana Yaubada unahawadavadavana.”

¹⁰*Kadu* gigaheku gigayo, “Yaubada yana venuwa'ata gigaheye-vagahina be hida bukiya gidadauda-ma keke unasevauyeni. Au unahawavemogatalena fa'ina gaitomai-dina hinalakayemu-ma adi tova ahe giluve'eda'ufo. ¹¹*Yesu* auhe'ama ginayemaunida fa'ina gaveyao adamoya hihuluhuluva koyona, au tovai-nadi kadu aimo hinahuluhuluva koyona. Gaveyao adamoya ase'asedi bwanebwanenena, au tovai-nadi kadu aimo bwanebwanenena. Tu gaveyao adamoya hihuluhuluva yamumuna, au tovai-nadi kadu aimo hinahuluhuluva yamumuna. Kadu gaveyao adamoya yadi dewa mahamahalina, au tovai-nadi kadu aimo yadi dewa mahamahalina.”

¹²*f*Tu Bana Yesu kadu gigahe gigayo, “Wanogali! Iya ganamaduyewa'ela. Iya laufata gana'aliyena ada kaliva sa'eyana sa'eyana yadi dewa yadi dewa amine adi laufata ganaveledi. ¹³*g*Iya'eku inubane kadu tabone, Iya wai ganagona kadu wai gamulina, Iya Abave'inuba kadu Abalauyabu.” Hidemi Yesu gigahe.

¹⁴*h*Tu gaveyao nuwahnagedi ana vaigau Sifi kabi'ona dayagine hicolakolana be gikwaya-mo'ena, medema yadi vemwamwala gavatubuga! Au adifaiweya abaluku againe hinaluku be Yaubada yana melala againe hinamiyami, ada Yaubada ginahawahegedi be yawai-vagata ana ai againe hina'au'a. ¹⁵*i*Tu melalai-nadi kwaune kaliva koyodiyao hinamiyami, badi kwelikweli tulina tulina hi'abina, to'udo toluve'alika, badi mali yaubada agaidiya hi'odu'odu kadu gaveyao moya'aidi nuwanuwadi ve'alololo ada tova moya'aina hiveve'alololo, medema kalivai-dina adi loi keke adifaiweya hinaluku.

¹⁶*j*Tu kadu Yesu gigayo, “Iya Yesu yaku tovenuwa'ata ahe ga'iveninisenana be hida gaitomai-dina omi tovetumagana ami yo'oi-mina agaimiya ginahawavemogatalena. Iya Devida bwanebwanenana, bana yana yo'o agaidiya gatubuyemu. Iya higa Iyauwahala ve'akinamanamaliku.”

e 22:7 Ha 1:3 *f* 22:12 2Ko 5:10 *g* 22:13 Ha 1:8, 21:6 *h* 22:14 Ha 22:1-2
i 22:15 Ha 21:27 *j* 22:16 Lo 1:3-4; Ha 1:1

¹⁷kTu Yaubada Alu'aluwana kadu yana Sifi kabi'ona vavinena higahegahe higayo, “Wa'ela.” Kadu hai kaliva hinavenogala, medema gilubodadi be meda hinagahe hinagayo, “Wa'ela.” Hai kaliva nuwanuwana lakahina yawai-vagahina ginanuhagana vaita agona gidataina amine, medema gida'ela yawai-vagata ana gufa gidavai-kawowona.

Yoni hida buki-nadi fa'ina givenuwa'atada.

¹⁸lTu iya Yoni ganagahe. Bana Yaubada yana venuwa'ata gigaheye-vagahina be hida buki againe gidadauda. Omi buki ana gahegahe wananogalina-ma hidede amine gagahevagadonemi. Hai kaliva tauna yana nuwanuwa hida buki ana nuwanuwa buye ginave'atutamo'aina, Yaubada mena kaliva ana matahiwadi kadu vita koyo-mo'edi hida buki gilukahihiyedi-ma buye ginave'atutamo'aina. ¹⁹mMeda hai kaliva Yaubada yana venuwa'ata hida bukiya gidadauda-ma ana nuwanuwa tufona ginavaihegena, Yaubada mena kaliva ana du'u ginavaihegena be keke yana melala mahamahalina againe ginamiyami kadu keke yawai-vagata ana ai againe gina'a, gaitomai-dina hagihagidi hida buki gilukahihiyedi amanadi. Au hidedemi Yoni gigahevagadona.

²⁰nTu Yesu hida hawavemogatala gi'alakakilina-ma, gigahe gigayo, “Taumadi ganamaduyewa'ela.”

Ika, Kaiwabu Yesu udamaduyewa'ela. Yama nuwanuwa ehe hidedemi.

²¹Omi Yaubada yana kaliva moya'aimi Kaiwabu Yesu yana nuwadogeya wanamiyami. Ehe hidedemi.

Tamama lobameya umimiyami,
 a egana mahamahalina anave'amohimohinena.
 Ya abavehimeya ana tova gidalakayemu ase'asemeya.
 Ya vehimeya lobameya hi'ita'itave'avina amine
 meda ime babiya ada'ita'itave'avina.
 Aiyeta sa'eyana sa'eyana amaga udavelevelema.
 Ime nagona tobohiyameyao yadi koyona
 avenuwauluyena amine,
 meda yama koyona kadu O udavenuwauluyena.
 Keke aba'aladibidibi againe unahawhegema tu
 kaliva koyona Setani againe unalugolegolema.
 Fa'ina O'eni ya wabavehimeya,
 O'eni ya wafaiwala, O'eni ya wakikaiwabu
 tova inaga inaga keke ana abalauyabu.

Ehe hidedemi.

^k 22:17 Ha 21:6; Ais 55:1 ^l 22:18 2Veh 4:2; Ha 15:1 ^m 22:19 Ha 22:2 ⁿ 22:20 Ha 3:11; 1Ko 16:22